

Tuang Za Khai

---

# Thapiakna THULUI-20

Mi lawhcingte, ahau zaw deuh,  
leh apil zaw deuhthe hipah tuanlo  
uh hi.



THAPIAKNA THULUI-20

**Tuang Za Khai**

## THAPIAKNA THULUI (20)

**Tuang Za Khai**

ALL RIGHTS ARE RESERVED.

Lai gelhpa' tung pan phalna omlo pi-in, hih laibu a them aneng khat peuh lakhia, behlap, leh hawmkhia cih khat peuhpeuh kibawl theilo hi. Tua bang khat peuhpeuh abawl nuam a om zenzen leh, lai gelhpa kiangah phalna ngen masa hamtang ding hi.

### EBOOK VERSION

Self Publishing

 **Image**

**Contact:**

Tuang Za Khai

[www.tuang.org](http://www.tuang.org)

*Lungkiatna ka tuah ciang, tha hong pia mimalkim tungh hih laibu tawh  
zahtakna kong pia hi.*



# THULUITE

[Preface](#)

[Thului 1](#)

[A Tungtuang Diakte' Tuacihna Thusim](#)

[Thului 2](#)

[Huih Diik Khat](#)

[Thului 3](#)

[Lamdawt Omlo](#)

[Thului 4](#)

[Peter' Nuntakna Pan Sinna Dawl-III](#)

[Thului 5](#)

[Kipawlkhopna A Thaneem Sak Thu \(3\)](#)

[Thului 6](#)

[Israel leh Bawngnawi le Khuaizu](#)

[Thului 7](#)

[Na Vawh Bangin](#)

[Thului 8](#)

[Goliath Na Thatnuam Hiam?](#)

[Thului 9](#)

[Na Dahciang Kaplel In!](#)

[Thului 10](#)

[Thumaanna Thukhun Pawlkhat](#)

[Thului 11](#)

[Kihhuai Mun pan Siangtho Mun Ah](#)

[Thului 12](#)

[Ezekiel' gen Gog leh Magog](#)

[Thului 13](#)

[Nu le Pa Thumang A Nahlawh Peek](#)

[Thului 14](#)

[Thumaanna leh Thopi \(4\)](#)

[Thului 15](#)

[Na Lungkiat Ciang](#)

[Thului 16](#)

[Muvanlai](#)

[Thului 17](#)

[Practice](#)

[Thului 18](#)

[Lincoln Tungpan Sinna \(4\)](#)

[Thului 19](#)

[Steve Jobs' Lunggulh](#)

[Thului 20](#)

[A Kiphawkkhalo Salpha](#)

[Laigelhpa](#)

## Thu Masa

Mihingte haksatna a thuakkha ngeilo ki omlo aa, a lungkia ngeilo zong ki omlo kha ding hi. Ahi zongin, lungkiatna tam veipi thuak kha ngei napi, a lawhcing veve mi tampi tak mah om leuleu hi.

Tua thu in, thalakna leh thapiakna mihingte' kikap pen khat ahih lam hong phawk sak pah hi. Tua thapiakna leh thalakna zong a tamman penpen khat mah hipah leuleu hi. Lungkiat lunggimna huhau in lungsim lamsang siavuante tawh nai khat sung thu kikup ding tampi piak kul hi. Tua ahih manin, lametna abei khat peuh in thalakna in hong neih nahih ding kizam aa, tua mah bangin, mite' tung tawnin zong tha na lak theih ding kizam leuleu hi.

Hih laibu sungah thalak nading, ahih keileh, thapiakna, thului (20) kong gelh hi. Laigelhpa in hih thuluite tung tawnin lametbei leh a lungkia mi khat peuh in thalakna in aneih theih ding ka lamet leh ka lunggulh ahi hi. Tua thului (20) sungah, thapiakna lian ahilo zong nih le thum kihel aa, ahi zongin thapiakna mah tawh a kibelpawl veve thei thuluite hi uh hi.

Thamlo in, hih laibu sungah a kigelh thului pawlkhatte pen, laibu dangdang, gentehna, magazine, laihawm tuamtuamte, leh a dang laibu tuamtuamte sungah a kisuaksak khin zong kihel hi. Tua a kisuaksak khitna munte in, laigelhpa' tungah thului ngetna omngei kha dinga, ahi zongin kileina cih bang leh copyright tawh kisai thukhun lamdang omlo ahih manin, hih laibu sungah kong gelh kik ciangin zong a lamdangin hong kingaihsun lo dingin a lamen kahi hi.

**Tuang Za Khai**

Postdoc Reseacher





## *Thului 1*

# **A Tungtuang Diakte' Tuacihna Thusim**

*A tungtuang diakte pen a pilzaw, a siamzaw, a ciimzaw,  
a neizaw, leh a theizaw diakte hikhin tuanlo hi.*

*– Napoleon Hill*

Khat veivei lawhcinna leh tungtuanna tawh kisai kitheikhial kha thei hi. A pildiak, a siamdiak leh a citheidiakte a tungtuang zo phadeuh in ki ngaihsun thei tawntung hi. American Scientist Harold Delos Babcock in “ei’ neihloh hihdiakna khat peuh aneite tungtuang diak uh hi, ci-in ngaihsut khakna pen alian mahmah supna lah hi-in mawhna lah ahi hi.” Ci ngei hi.

Napoleon Hill in kum 25 sung vingveng, lawhcinna tawh kisai abuaipih dipdep khitciang, a tungtuang diak mite lakah 5% bekbek pildiakna leh siamdiaknate hangin a tuaci thei uh ahih lam na theikhia in, John C. Maxwell in zongh kum 30 sung vingveng a kattel khitciang, 15% bekbek siamdiakna, pildiakna leh cihtheihdiaknate hangin a tuaci uh ahih lam na mukhia hi. Thomas A. Edison in zongh, tungtuan na dingin hihdiakna 1% bekbek kizam hi ciliang hi.

Tua ahih leh tua hihdiakna (talents, ability etc..) te’ sangin a thupizaw om lai gige cih kilangh hi. Tua-a thupi zawpen bang hi peuhmah ding ahiam? Thu thum ih longkhia ding hi.

## **Kiniamkhiatna: Sinnopna Lungsim**

Kiniamkhiatna pen kineuseekna tawh kitelkhiat kha thei leuleu hi. Sumbawl minthang leh laigelhsiam minthang Ken Blanchard in “Kiniamkhiatna pen ih neih hihna zah sa’ngin a niamzaw aa kingaihsutna hilo in, ih hihna mahmah tawh kiniamsakna hi.” Naci hi.

Khatvei Billy Graham kiangah mikhat in, “Billy Graham a cih pa nahi na?” Ci-in va dongh hi. Graham in “He himah ingh” a vacih leh tua mipa in, “aw... mi minthang mahmah pa lah nahi aa?” Graham in, “kei minthang hiaulo, ka tangko gupna thu a minthang hizaw..” Bangzah in hih mi tungtuang diak pa kiniamkhiat ahiam!

Crusades 20 Years with Billy Graham cih laibu a gelhpa John Pollock in, “A thugen ngai-in a om mi tulsawm sa’ng a tawmzawlo mite’ mai pan, Graham in, ‘ka kilawmna bangmah omlo hi, na khempeuh KHA tha hang bek hi.’ Ci-in, khitui luangzeenin a kiniamkhiat den mahmah thupi kasa hi.” Ci-in gelhzen hi. Leitung ah mi tungtuang diak khempeuh phial a tuaci kiniamkhiat ciat uh himai hi.

South Africa ah mivomte sungpan a masa pen President asem Nelson Mandela in sumbawl minthang mahmah Peter, zingan neekpihna khat nei ngei hi. An sim dingin Peter apai ciang, a company aa nasem Dumi mawtaw hawlsak in vapai uh hi.

Mandela’ inn a tun uh ciang, mawtaw khawlina ah Mandela in na nangak khin pahphot hi. A ngeina bangin mawtaw hawlpa aihleh mawtaw sungah omsuak in, apu Peter leh Mandela te innsung ah anne dingin tum uh hi. Ankuang um dingin a kithawi uh ciang, Mandela in, “Peter denin minih hi uteh kaci aa?” A vacih leh, Peter in, “keikia mah hi-ingh, hua khatpa bel mawtaw hawl hilel ee” Cikik hi. Mandela thakhat thu in ding khia vat in, Dumi’ omna ah pai pah vingveng hi.

Dumi kiangah amah mah a kigen tawm khitciang, an nekhawm dingin, inn sungah lutpih hi. Hi bangin kumpi khat nangawn a kiniamkhiatna a muh ciang Peter in lamdangsa mahmah ahih manin, “kumpipa nangawn hizahin hong kiniamkhiat ciang,

kei zongh ka kiniamkhiat loh phamawh hi..." ci-in gen kik hi. Hi mi tungtuang diakpa zongh kiniamkhiat mahmah sam!

Kiniamkhiatna in kiliatsakna tungah thunei mahmah ahihlahm Peter leh Mandela tung pan ki-thei hi. A kilainsak sim khinkhian, Peter, a kiniamkhiat mahmah khat tawh a kituah ciang, kiniamkhiat loh phamawh in hong piang lian mawh hi. Na kiniamkhiat mahmah naakleh a kiliansak mahmah khat na khutsungah hong ki ap pelmawh ding hi.

Leitung tangthute en lehang kiniamkhiatna hangin mite lawhcing tetek napi kiliatsakna hangin a puklawh leh a suplawh mi simzawh ding hilo zah dongin tammawh hi. Pawlkhatte a pilna uh leh a siamna uh tawh kituak mah in kiliansak khop pah lel uh aa, pawlkhatte leuleu a neihna leh a liatna hangun ultung pah gipgiap uh hi. Hibang mite lawhcing paisuak zolo thamlo in, mite' totcil in omkik thei tawntung hi. Bang hang hiam cihleh kiniamkhiatna lo tawh tungtuanna taktak a om theihloh hang ahi hi.

Kiniamkhiatna pen tungtuanna dingin kongkhak cingpa tawh kibangh hi. Ih siamna, ih neihsa, ih pilnate lungngai-in, ih kisaplai thute ih mangngilh khak ciang, tua kong cingpa-ahi kiniamkhiatna pen kiliatsakna kongkhakpi-in khaknelh cip thei hi. Kong kikhakcipta ahih manin, muhna leh deihna omthei nawnlo in, dinkhawl khata hi. Tua a ki dinkhawl hun sungin a kiniamkhiat mite, na manawt den uh ahih manin, a dinkhawl mite tuancil cip ta hi.

Kiniamkhiatna in deihna leh sinnopna lungsim kihongsak aa, kiletsakna in sinbeh ding leh zonbeh ding a kism khempeuh khaktan cip zo hi. Tua ahih manin, tungtuan zawkna ding leh lawhcin zawkna dingin, sinbeh, zonbeh, kanbeh nopna lungsim hong piangsak pelmawh ahi 'KINIAMKHIATNA' nuntakpih loh phamawh hi. Tua kiniamkhiatna nuntakpihna tung tawnin a lian mahmah ahi theihna namcin leh zawhna namcinte ngah zawhna ahi hi.

## Hilhding Utna: Sinna Kalmasa

November 1860 kumin, D. L. Moody neih Sunday School ah Abraham Lincoln va hawh hi. A ithuai mahmah naupangte maingat kawmsa in Lincoln in;

“Hilai aa, note sungah a zawng penpen khat bangin kei zongh mizawng mahmah khat kahi hi.” ci-in, mitui nam pillpelh zeenin a gen khiankhian kawmin naupangte’ maitang khat khitkhat baan et kawikawi-in, “...ahi zongin tu in ahihleh America kumpi ka hita hi. Note’n zongh hilai aa’ hong kihilh thute deih in, na zuih naak vualeh kumpi suak zolo ding kici theilo hi...” Ci-in tha apiakna thu John Perry in 10 Christians Everyone Should Know Cih laibu sungah nagelhi.

Thapiakna mawkmawk hilo in, amah tawh kigenteh ngiatin ahi takpi thutawh tha akipia uh ahi hi. Thu kihilhna deihin zuihna lo tawh ki tungtuang theilo ahilam, Abraham Lincoln in na theician mahmah khin hi. Tungtuang in lawhcinna dingin thuhilhna deihloh phamawh hi. Tua thuhilhna deihna pen tungtuanna dingin, sinna kalmasa hipah hi.

Think and Growth Rich cih laibu gelhin leitung bup a lokkham zo Napoleon Hill in, “bukno inndei khat sungah piangin, kum 10 ka phakciang ka nu in hong sihsan aa, hong nusiak khit kumnih takciang nukik tawh ka kisin hi. Kum 13 ka phak ciang, seploh phamawh ahilam manin laihawm nasep peuh semim sum ka zong aa, kum 30 sung vingveng mah haksatna, buaina, guallehna, zawwna, zumna cih thuhaksa bekbek in hong dawntuah den hi. Ahi zongin, tua thuhaksate khempeuh ka lawhcinna dingin ‘thuhilhna’ na hizaw gige..” Ci-in Andrew Carnegie kiangah a genna thu F.W. Woolworth in Napoleon pahtawina lai apiakna sungah na guang hi.

Thu hilhna pen namtampi tak om ding hi. Kam tawh thuhilhna, thutawh thuhilhna, tuahkhakna tawh thuhilhna cih bangin tampi om kha ding hi. Thuhilh ding a deihlo mipen, a theihna leh a siamna ki behlap thuah ngeilo ding aa, haksak buaina khatpeuh a tuah ciangin zongh thuakzolo in a nungtolh dente mah hipah lel ding hi.

Orison Swett Marden in, The Secret of Achievement (To Success in Life) cih laibu a gelhna sungah, Daniel Webster’ thu

themcik na guangin, “Daniel pen a neu a kipan lai a zo phalo khat ahi hi. A lawmte in neumuh in nulhnau den uh ahih manin a omna peuh ah maizumin khitui tawh a kidim denkhat ahi hi. Lungkia in sangtawp ding cih a khensat laitak, a veng nupi khat in thapia in, sang a vakah kik nading leh tu a-athuak thuhaksate ama a dingin thuhilhna khat ahihlam ana genpih pihpih aleh, sang hong kah kik in, a sawtlo khat in, tua mihai Daniel pen a pilpen khat in hong kiciamteh lel mawk hi.” Ci-in na gelh hi. Thuhilhna a deih ciang, lawhcinna, tungtuanna in na nungzuih pah lian hi.

KFC neipa Colonel Sanders, kum 65 aphak na ngawnciang lawhcing nailo in ahanciam ciam lai ahi hi. Amah mah in mawtaw hawl pah ngeungeu in, khua khat khit khua khat ah a sakansa pua kawikawi-in, ansaite ah ciamsak kawikawi hi. Giah nading nangawn ngahzolo zel ahih manin, a mawtaw sungah lummai lel aa, a sakan puak bekmah suantak in nei-in tua bektawh kinaamtak lel hi.

Ansaite a ciapsak kawikawi hangin, kua mah in, thudon peuhmah lo uh hi. Mi 1,009 bang ciamsak khin napi, kamsiam khat zongh a kipiak kikloh ciang lungkiat huai sa mahmah sam hi. Mi a 1,010th petpet ciang, “aw... na khutma sia kei ei lawm...” cihkikna aw khat za kiau hi. Tua kiau ziau bekbek pen Sanders in thangah mahmah in “ka khutma in leitung zelzo inciai...” acih deep leh tu’n a tangtung khin lah hong hiziau ta. Sanders bek hikei, mi tungtuang diak khempeuh phial a tuaci ciat uh ahi hi. Nang bang tawh hong kithuhilh ahi hiam?

Thuhilhna ahi haksatna, buaina, gentheihna, supna-a kipan a tuamtuum phutkhak khat limlim mikim in kinei kimciat hi. Ahi zongin, tua thuhilhinate’ tungah bangcih nuntak cih pen eimau teeltheih thu hileuleu hi. Pawlkhatte in tua thuhilhinate deih in thupi sim uh aa, siamna leh theihna a ngahlawh laitak un, pawlkhatte in deihlo in muhdah bawl leh lau ngaihsut uh ahih manin, phu nuamlo in, nung khinsan uh hi. A phawkhuai mahmah thu khat in, tua thuhilhinate zawhlah ding hilo thamlo in, pilna leh picin khantoh zawkna ding hizaw gige ahih lam theih huai mahmah hi.

Tua ahih manin tungtuan diakna dingin, HILHDING UTNA lungsim nuntakpihloh phamawh hi. Tua ih nuntakpih khitciang

bekin tuahloh a phamawh thuhilhna-ahi, haksat buainate' tungah gualzawhna la in ih tungtuang diak zo pan bek ding hi.

## **Vaipuaklakna: Picinna Kalmasa**

Khat veivei vaipuaklakna cih tawh kisai-in, a ki ngaihsun khial thei khat pen, sep dingin hong kisawl thukhat peuh sep zawhna pen vaipuaklakna kisa kha thei hi. A taktak in 'vaipuakla' cih kammal pen 'Vaipuaksawl' cih kammal tawh kilehbulh lian hi. 'sawl' hilo in 'la' ahih mah bangin, hong kisawl ciang sepna lel pen vaipuaklakna hilo aa, hong kisawlo pi mah latawm aa septawmna pen vaipuaklakna ahi hi.

Cuba buaina tungtang ah U Thant in vaipuak la in, a hanciamna leh a daihsak zawh takpi na thu mikimin ih theihciat ahi hi. Tua hunlai-in, U Thant pen UN General Secretary a kipin leennailo in, kisinsakna (impermanent) hun sungah a omlaitak ahi hi.

October 24, 1962 ni-nitak in Council Meeting khat nei uh hi. Mun tuamtuam pan apai ta'ngmi tamlua mahmah ahih manin, tutna khempeuh a dim phitphet baanah, honpi khat tutna ngahlo in ding zihziah lai uh hi. Tua hunsung ah U Thant in, "UN pen lungkham huai mahmah dinmun ah ih omlaitak ahi hi. Hih buaina ih daihsak zawh kei leh UN bek hilo in, leitung milip khatciat in siatna a manawh khinta ih hi hi. UN Secretary kip ka hih nailoh hangin, mihing khat ka hihna tawh kong thumnop in ah: ih lungsim ki-ukzawhna leh daihna phuh nopna lungtang tawh khut kilen khawm dingin ke'n itna tawh kong zawn hi..." Ci-in, itna leh veina tawh amah mah in vaipuakla tawmin, kipia tawm hi. Tua a vaipuaklakna hangin a nunungna ah daihna-a phuhpih zawh takpina thu Ramese Nassif in U Thant In New York (A Portrait of third UN secretary-general) cih laibu sungah kim takin gelhin na pahtawi didek hi. Hithu mah U Thant a dingin a minthan pih pen thu khat leh a tungtuan pih pen thu khat hong suak hi.

EQUIP leh INJOY Stewardship Services phuankhia in, mite a makaihsiam na hangin a minthang vangvang John C. Maxwell in, "vaipuaklakna pen mikim in ih neihtheih a thupi penpen hihtheihna

khat ahi hi. Kithawikhia in tua hihtheihna ih zatkhiat theih bekciang, ih nuntaakna sungah tungtuan zawkna khat hong kipan pan ding ahi hi." Naci hi. Hi mahmah hi. Vaipuaklakna in theihna behlap in, tuahkhak sinna khangsak hi. Theihna leh tuahkhakna kibehlap lopi-in ki tungtuang zo ngeilo ding hi. Bang hang hiamcih leh mite a theihna uh leh a tuahkhak uh a na kibehlap den uh ahih manin, nang a' a kibehlap kei peuhmah leh hong kipaisan lel ding himai hi.

Vaipuaklakna lungsim aneilo mikhat in ama mawhna nangawn, mite' mawhna suaksak ta leuleu thei uh aa, vaipuaklakna lungsim anei mikhat in bel mawhna a kici khempeuh zawhna suaksak thei ta leuleu hi. Mawtaw Company a phuankhia cilpa Henry Ford in, "manager khat in anuai aa nasemte peuhmah mawhsak hetloh ding sangin a thupizaw bang mah omlo hi. Mawhsakna hangin lawhcinna omngeilo napi, lawhsapna omsak den zaw hi." Kimawhsakna leh vaipuak laknoplohna in kitamkhapna leh nuaikiatna piangsak den ahih lam Ford in tel mahmah cihna ahi hi.

Stephen Covey in The 7 Habits of Highly Effective People cih a laibu gelhna sungah, lawhcinna dingin vaipuak lakzia ding tampi na gelh aa, tua sungah ahoih mahmah khat in "lawhcinna dingin a thupi mahmah vaipuaklakna khat pen, a kism/a omlo mikhat pahtawina-ahi hi. A mah na pahtawina hangin, a omte/a kicingte tungpan muanna nangah lawh ding hi. Bang hang hiam cihleh khat tungah na bawl thu in 99% te huzaap zo ahi hi." Na ci hi. Vaipuak lakna in siatna ding pan suahtakna piangsak thei-in, muhna theihna leh siamnate zongh khangto saksak pah hi.

Tua ahih manin, tungtuan ding leh lawhcin diak ding lungtup in a nei mikhat in vaipuak laknopna lungsim neihloh phamawh hi. Tua vaipuaklakna hangin, haksatna buaina leh gensiat cilphihna ki phukha thei ding aa, ahi zongin, tuate hang mah in, theihna, muhna leh siamnate khangto in picinna sungah hong lutpih ding hizaw hi. Tua-ahih manin, tungtuan diak nadingin lakloh aphasawh VAIPUAK LAKNA lungsim neihloh phamawh hi.

## **Thukhupna**

Hihdiakna, kivakna khat peuhpeuh ih neih hangin tungtuanna kingah den zolo aa, ahi zongin theih beh nopna leh sin beh nopna lungsim ahi, kiniamkhiatna lungsim nei-in, sin behna leh katbehna sungah tuakhak thute khempeuh thuhilhna-ahih lam phawk in, zawhnopna leh siamnopna tawh kipiakkhiatna, vaipuaklakna lungsim nuntakpih in mainawt aa, a kalsuan mikhat in, lawhcinna leh tungtuan zawkna ngahlo in omlo ding hi.



## *Thului 2*

### **Huih Diik Khat**

*Huih siangtho pen nuntak nading bekin a ki diik hilo in,  
lungsim cidam nading, lungnop nading,  
leh kha suahtak nading mahmah in zong a kizam ahi hi.*

Mihingte huih lo in minute thum tungkaan kinungta zolo aa, ih khuakin minute 4 pan 6 kikaal sung bangh huih ngah keileh nasem nawnlo hi. I nuntakna dingin ahuampi-in mi cidam khatin khatvei huih ih diik ciangin huih siangtho thawl (liter) 0.5 L (500 mL) bangh kizangin, minute khat sungin liter 7 pan 8 kikaal bangh kizangh hi. Covid\_19 pulnatna in ih gam hong baanin, huih (oxygen) manphatna ih theikha-aa, liter 20 bang pen Ks 600,000 kiim bangin kilei hi.

Tua-ahih manin, khatvei huih ih diik ciangin, Ks 15000 bangh kizangh cihna-ahi hi. Tua bangin khatvei huih ih diik kawmin huih niin 25 mL bangh mihingte in kikhah khia leuleu hi. Huih siangtho nuamtakin diik theilo in oxygen sum tam pipi tawh ih lei' ciang, cidamna-amanphatna lam bek ih phawk-kha thei aa, huih manphatna ih ngaihsun kha tuankei thei hi.

Mihing khat ii huih diik khat Ks 15000 bang man ding ahih leh, tu laitak aa na kum phazah tawh ngaihsun in, na suak pan kipan-na huih diikte bangzah man ding cih lungngai lecin; tua zah aa-amanpha huih amawkna in nuamtakin ih zat theih dingin Paisanin bang zangh aa, tua huih siangtho pianna bangzah in it huai-in, bangzah in thupi ngaihsut huai hiam, cih na phawk ding hi.

## **Huih siangtho koipan hong piang?**

Tua zah aa-amanpha leh akisam huih siangtho pen koi pan hong piang hiam ih cih ciangin mihingte' tung pan hilo in ih kiim leh ih paam ah a om singkung lopate pan hong pai ahi hi. Singkung lopate in amau nuntakna dingin mihingte' a ding alauhuai huih niinte zangh tumin, huih siangtho khah khia hi, tua pen 'photosynthesis' kici hi. Gammang tulak ae-kah (acre) khat leh alang in kumkhat in huih niin 65 tons (1 tons = 1000Kg) bangh zangh tum thei-in, huih siangtho 3.5 pan 5 tons kikaal bangh khahkhia zo hi.

Hithu I ngaihsut ciang lungmuan huai ding tawh kibangh napi, mihingte leh ganhingte in ih diik suk ih diik-tohte baan-ah sepna bawlina leh a ngeina tuamtuam pan apiang thu tuamtuamte hangin setkan (second) khat in huih siangtho a tawm penpen 10,000 tons kizang tum den leuleu hi.

Tua mah bangin, zatloh a phamawh van tuamtuamte; gen-tehna, plastic, motorcycle, smartphone cihte akipan a dangdang van tuamtuamte ih zatna huhau in, setkan khat in huih niin 2,400,000-pound (lb) bang kikhah khia den lailai hi. Hih dungzui-in, a kituat ciangin huih sungah singkung lopate' khahkhiat huih siangtho khempeuh pen, tuma kum 3000 kiim sungin a kizang tum (bei) khin ding ahi hi.

Ahi zongin, I kaamphatna citciat khat ah, nuntakna dingin na asem a kikim citciat tissue (cell) nih: zat-tumna (cellular respiration tissue) leh hawmkhiatna (photosynthesis) te a kituat ciangin, singkung lopate ii tissue khat in huih siangtho a hawmkhiat zawhna tha pen a kikimpih zattumna tissue khat ii zattum zawhna tha tungah a zah 30 bang hatzaw kiau bilbel hi. Hih vilvel in hong huhuh ahi hi.

## **I huih diikte a siangtho hiam?**

Tua singkung lopate pan apiang huih siangtho sungah huih niin 300-350 ppm (parts per million) bangh a om ding a ngeina hi aa, tua sangin a tamzaw a om ciangin huih niinin kiciamteh hi. Huih sungah huih niin 1000 ppm sangin a tamzaw om zenzen leh diik

dingin ki zang thei nawnlo dinga, ih zangh phial zongin natna tuamtuamin hong buluah in kisipah ding hi, ci-in mipilte in gen uh hi.

Huih sungah huih niin kihel zah a kiteh ciangin 1960 kumin 317.3 ppm, 1980 kumin 338.76 ppm, 2000 kum ciang 369.71 ppm, 2020 kum ciang leuleu ciang 414.11 ppm, leh 2022 ciangin 417.06 ppm cih bangin kihelin ih huih diikte siangtho nawnlo hi, cih kimu thei hi. Huih niin kibehlap zia ih et tak ciang kum khatin 2 ppm kiimta bangh khangto den mawk hi. Hi dungzui-in khang toto leh tuzawh kum 300 kiim ah, huihte ki diik thei nawnlo ding cihna-ahi hi.

Tuni mahmah in zongh, tua huih niin huhau in, khua hun maan nawnlo, nisa semsem, gam keu tektek, acid guah hong piang, guahtui luanhun maan nawnlo, amunmun ah tuiciin tung, mincim, ziin liing, cihte a kipan, nisa pan apiang dat hoihlote adaal 'ozone layer' a kici kikeek semsem, cihte khempeuh hong khangin, tuate' hangin mihingte' tungah natna lamdang tuamtuam ahunhun in hong tam semsem khinta-ahi hi.

Tua-ahih manin, huih niin pan hong piang buaina pen 2017 kumin leitung bup sumbawlna lamsang kamkupna (World Economic Forum) pan, a lianpen buaina in ki ciamteh hi. Tua-alian pen buaina in mi khempeuh a kisukha hong suak hi.

## **Huih siangtho I ngah nading I sep theih a om hiam?**

Tua buaina lian pen pan suakta in huih siangtho I ngah kik theihna dingin, mi khempeuh in a kistem thei thu nih om hi. Khatna-ah, singkung lopate it in, phuk mawkmawk lo in, suan behbeh ding kizam hi. A nihna-ah huih niin a kibehlap na dingin tha-apia gamtatnate pelh zawhzah aa pelh ding kizam hi.

Gentehna: Khamtung ah tui tha tawh mei kinei kim zolo ahih manin, sing leh holte a tawm theithei zat ding hanciam huai hi. Plastic zong a tawm theithei zat ding hanciam huai hi. Banghang hiam cih leh, plastic bawlna huhau bekbek in kum khatin huih niin awn 5 tons peuhmah piangin, a kizat khit nungah a kimawk paih plastic 1 Kg in huih niin 3 Kg khak khia sawnsawn hi.

Thamlo in plastic tawh a kitun neek theih khat peuhpeuh ih neek ciangin, natna tuamtuam, a diakin cancer natna ngahna ding tha pia hi. Khe tawh hunlap tak aa-a kitung ding mun te, mawtaw (car) ahieh keileh motorcycle te zangin pai huailo hi. Banghang hiam cih leh, mawtaw (car) khat nai khat sung a taai ciangin huih niin 2 Kg bangh khah khia hi. A hih theih leh, phone, TV, air conditioner (AC) a kipan, a dangdang electronic vante zongh laih themthum huailo hi.

Ahang pen, tua vante a kibawlina huhau in huih niin khang mahmah hi. Smartphone Sony Z 5 namte bekbek a kibawlina huhau in kum khatin huih niin 19 Kg sangin a tawmzawlo piangsak den hi. LCD TV letmat 32 khat a kibawl ciangin huih niin 370 lb bang piangsak thei aa, AC khat a kibawl ciangin huih niin 2,000 Kg bangh piangsak thei hi. Hite khempeuh sia-in akizat-theih nawnloh hun ciang, siatna (huih-niin, leitang kisia, khuahun kisia, natna tuamtuatm) tampi piangsak zawlai hi.

## **Thukhupna**

Tua-ahieh manin, man piakloh aa ih zat huih siangtho diik khat bekbek bangzah in manpha in, tua huih siangtho diik khat apian theih na ding singkung lopate a omloh phamawh cih ih thei aa; eimau mihingte' huhau mahmah in huih niin semsem khinta cih zong ih phawk hi.

Hih thu tawh kizui-in, mi khempeuh in a ki sem thei thunih ih nei aa, tuate hanciamin ih sep dung zui-in, kiim le paam hong nosuak-kik in, huih hong siangtho kik dinga, khua hun hong hoieh in, gamsate hong inntek kik aa, kiim le paam daihna pan lungsim pumpi nopna leh damna lamah hong manawh kik-kik ding ahi hi.

## *Thului 3*

### **Lamdawt Omlo**

*“Ka ngaihsun hi...  
ka ngaihsun kik aa, a kha in hongbei hi..  
Tuabek hilo ngaihsutna tawh kum hongbei hi.  
99 vei dongciang kangah a phite  
a maanlo pi hithei lai zen hi..  
100 vei taktak teh a maan (a dik) ka ngahzo pan hi...”  
– Albert Einstein*

Leitungbup ah mipil leh misiam pen khat in a ki ciamteh, ipu Albert Einstein ii kammal te' lakpan khat a hihi. Leitung ah mi minthang icih te khempeuh a sepna-a bawlna uah a hun uh leh a thahatna uh tampitak a zanghlo kuamah omlo hi.

Haksatna buaina tampi tak thuak in, gentheihna leh tuahsiatna tampitak thuak masa lo in omlo uh-hi. A tup a sawm uh a ngah theih na dingun cihtakna tawh nungta in lungduai tak in a hanciam te a hi uh-hi. Meter 100 pen Second 10 sungin a taaizo, taihat in a minthang mite in, ki mawlna hun sungah Second 10 sungbek a tai ziau nading lel a hun uh bangzah piakhia in, a thahatna uh bangzah tawh ki sinkhol uh a hi hiam? Cih na ngaihsun kha ngei hiam? Hanciamna leh hun piakkhiatna omlo pi-in 'MI' kisuak zolo hi.

La (poet) gelhsiam in a minthan ban-ah, a gelhsa laibu te Leitungbup ah pau' nam (20) valtawh a kilet khiat sak Sir. Robert Frost; Laibu bawl dingin a kipat cil-lai, kum (20) sung bangh a buaipih khit-teh bawlkhia zo nailo hi. Tuahun lai-in, lungkia-in

tawlinga zenleh, a min theikha hetlo ding hihang. Lungkia hetlo in cihtakna tawh damdam in a sep teitei leh leitungbup ah minthan lawh-hi.

A merica kumpi teng lak ah mi khempeuh in ih theih Abraham Lincoln, mizawng daipam khat pan a khangkhia mikhat hi aa, kumpi a suahtheih na dingin zongh (7) vei bang nungkik-lo-in a hanciam a hihi.

Lai Siangtho sung mahmah ah zongh, Moses in Israel mite Canaan gamnuam a tunpih nading, kum (40) sung tawntung-gamsungah a hun beilawh-hi. Paul (Solo) a ki khelkhit kum (14) dongciang kuamah in umlo in thupimuh ngiatlo uh-hi. Pasion' tapa-ahi Zeisu nangawn in apa' deihna- asep khat zawh na ding kum (30) bangh ahun beisak hi. Zeisu leh a nungzui te an-neek-khop tawpna (the last supper) lim, Davanci-in kum (4) sung vilvel asoih ciatciat a hihi. Lamdawt cihbangh omlo hi.

Khat veivei hanciam tak-in ih kalsuan laitak mah, a gualzo sa leh a lawhcing sa te peuh ih muhciang ki eng in, amau bangh ih hih ding ki ngaklah luakha thei hi. Khanglui te in: "...An min ngaklah gilna..." cih leh "...Lamdawt tawn, kumkua in tunglo..." cih paunaak aneih uh hoih kasa mahmah hi.

Hauh ding ki ngaklah in, lamdawt-tawn hauhtheihna ih zui ziauziau aa, tua ihngah hauhna na ngawn nuamtak zangh ngamlo in launa lungsim tawh ih nuntaakna bei diaidiai hi. Ih tuu ihtaa' khang dongciang mangthei ding cih thadah, ei' nuntaak sunglian nangawn ihkhom zokei hi.

Nikhat, ninih peuh ankhang khamtheih ziauna bek ki muthei ta lawmlawm sam ahih manin, ihneih a manpha mahmah ahi, Paalpi paak aa kipan, gamsung van manpha tampi te ki zongin, a zung a maam in ki botkhia gawpmai aa, kum (100) bangh apha ding singkung lianpipi cikzia hetlo in ki phuk ziahziah den lawmlawm a hih manin, etlawm mualkuam, zogamnuam ih cihcih, ih zogam leitangh, etlawm zo nawn hetlo in tul ngiungeu ta-aa, khuangaih-huai mahmah ta hi.

Khuahun nangawn in thuakzo nawnlo in, a sat huntah salua, a vot huntah votlua zelta hi. Khuahun kisiagawp ahih manin

dawnding tui siangtho leh neek ding anteh theipuam a kicing in ki ngahzo nawnlo hi.

Tuabang haksatna ih thuak zihzeh ciang, ih lungham in ih hehsuak ahih manin ih hanghang nuam lai sawnsawn hi. Eima bawl' a hih lam phawk khalo in, Pasion peuh ih mawh saksak nuam lai thei hi. Banghang hiam cihleh, ih gilna mahmah ta mawk hiven.

Nuntaakna ding hanciamna leh sumzon paizon-na-ah ih zulhzau mah bangh lian in pilsin te leh siamsin sang naupang te in zongh lamdawt ki zuinuam mahmah lai mawk hi.

Nidangin ei mite apil masa leh a theimasa kihi napi, tu huntah lamdawt ih zuihzuih khak na hangin mite' nungzui-in, ki om khinta-aa, gilna in ih gimsim ta hi. Pawlkhat-te a dinmun uah gilna in a luplup laitak, pawlkhat te leuleu lamdawt a zuihna hangun gimlua uh a hih manin, mainawt zo nawnlo uh-hi. Pawlkhat te leuleu an-min ding ngaklah in a ki lekkek na lamteng in a-an bel bunglip kha sawnsawn uh ahih manin, lungkia in tawlnga mai uh-hi. Tawlnga in, tawlnga paisuak uh a hih manin, a mau a dingin zongh kumkua cingthei ngeilo hi.

Lamdawt zuihnopna leh an-min ngaklahna te hangin, gilna in a lumlum tawh, hihna mel ki theilo in a mai mangmang tawh ki thehthang gaita hi. Hibangh thute hangin zomi te thangkiak lak ah ki gammang khinta hi. Gualzawh na ding hong khaktan thei zulhzauna lungsim a hi, lamdawt zuihna leh matut na ding hong khaktan thei cihtak lohna lungsim a hi, an-min ngaklah na lungsim te paisan ding kism mahmah ta hi.

Leitungah mihau in a minthang Bill Gates hauhna zia, pil mahmah a hih manin a pilna tawh leitungbup a ki khelsak zo Marie Curie' thumuh zia, Pasion' a dingin a nuntaakna khempeuh a piakkhiatna hangin a lawhcing mahmah John Wesley' vangliat zia, cih-bangh in mipil, misiam, mihau leh mi khangto khinsa te ih ngaihsut ciang, a mau bangh ki ut in ki eng mahmah na pi, a thuakna uh leh citak-tak in a hanciamna te uh ngaihsun kik leuleu lehang ki deihgawh zo nawnlo thei mawk hi. A maute in a hih leh cihtakna leh kuhkalna nuntaakpih khin uh a hih manin, hanciam ding khempeuh leh thuak ding khempeuh lunghiang hetlo in phuto ciatciat zo lel uh-hi.

Tupna kician nei-in Pasion ki makaih sak uh a hih manin a hunhun in gualzawhna in gak-khol khinta hi. Bangbang buaina-a tuak hangun, lungkia lo in, zong ngaklah lua kha selo uh-hi. A tuah uh thuhaksa te a hih leh mikhempeuh in a tuak zelzel a hih lam thei uh a hih manin lamdang zongh sa selo uh-hi. A maute in a tupna uh telcian sinsen uh a hih manin, lungkiat dingin ngiahsun hetlo uh-hi.

Leitung ngalpi (2) na hunlai-in thukansiam in a minthang mahmah, William Shirer, na theikha khin ngeel ding hi. William in galpi aven' khितte laigelhsiam khat suaazawh ding tupna khat nei khinkhian hi. Kum (12) sung tawntung hanciam in lai tuamtuum gelh napi, a lung-gulh bangin a ma tun zolo mawk hi. A bawlkhiat theihsun te kideih ngiatlo a hih manin a innkuan sung nuntaakna uh zawnlawh diipdeep hi. Tuabang hunsung lian mah in laimai (1200) bang apha ding, Laibu sah mahmah khat hong hanciam leuleu mawk hi.

Tua Laibu a mu khempeuh in, hizah aa-asah Laibu ki zuakthei vetlo ding hi... ciciat uh-hi. A Laibu manzah dingleh na hanciamna kituak theilo ding hi. Na nasep haihuai, gimhuai lel hi, tawlnga hithiat zaw-in, ci-in mi khempeuh in buaipih mahmah uh-hi. A innkuan pih te mahmah in zongh "Laibu hong bawl nawn kei tapeuh in, puuksih lawh ding hihang..." ciliang uh-hi.

William lungkia tuanlo in, Hitteler hunsung aa German gam omzia, athu ala, cingtak in a kaihkhop 'The Rise And Fall of The Third Reich' cih thulu tawh a Laibu bawl hawmkhiat theih ding ciang tunta hi. Tua-a Laibu pen a tawm thei penpen \$ 10 nuai-in ki zuakthei vetlo ding hilian hi. Tua hun in Laibu tuazah man omngei nailo hi. Mi khempeuh in a ki khawngzo dingin lamem hetloh uh-hi. Kua ma-up hetloh leh lamet hetloh laitak mah in William in a laibu a zuak khiat teitei leh, a hawmkhiat cil ni lian mahin, abawl khempeuh khawngkhin pah-hi. A hunhun in kei deih toto aa, tuni dongciang a ki deih penpen Laibu te' lak-ah khat in ki ciamteh-hi.

A kiim a paam' buaipihna leh a innkuanpih te' muanzawh loh na hangin William lungkia lo hi. Lai at minthang khat a suaazawh na ding lungduai tak in kum sawmnih vaal bangh buaipih-hi. Kum (12) sung tawntung lai gelh tawh buai mahmah khin napi, kua mahin a lai gelhte deihlo mawk hi. Lungkia lo hi. Zongh ngaklah lo



hi. Lungduai tak leh citak tak in a lung-gulhna-a hanciam teitei leh leitung ah minthangin, a min mangthang ngei nawnlo hi.

Na khempeuh a hoihna tawh kituak in thaman piak a kul vive a hihi. Na hoih leh na lianpi deihna pi, cihtak ding leh kulhkal ding ih tup masak kei leh ih hanciam na thaman omlo ding hi. A ol-ding leh a manlang ding bekbek ngaihsutna in siatna leh supna hongtun' thei zaw tawntung hi. Pasion mitsuan in cihtakna leh kulhkalna ih nuntaakpih khitciang bek in ih zogam hong paal-lun kik zo pan ding hi. Tuahun ciang a hihleh, 'etlawm mualkuam, zogam nuam' ih cihcih hong taksuah ta ding hi.

An min ngaklah bangh aa ngaklah themthumna pan hongpiang, lamdawt-tawn hauhna leh pilna te paisan ta ding hihang. Ih hauh leh tua hauhna pen a kip a kho ding hauhtaak hauhna taktak hi henla, pilna in a makaih hauhna zongh hita hen. Tuamah bangin ineih pilna te pilna taktak hi ta henla, Pasion zahtaakna bulphuh in a piangkha pilna taktak hita hen. Theologian khat leh mipil muantaak khat aa ingak a hi, Dr. Do Sian Thang in: "...Hauhna pen pilna in makaih henla, pilna a hih leh Pasion zahtaakna-ah kiphut-ta hen..." na ci hi. Ka lungsim honglawng mahmah hi.

Tuabang pilna leh hauhna namte ihneih hun tak ciangin, tua ih hauhna leh ih pilna te' hangin ih lung-gim nawnlo ding aa-a khang a khang in zongh kip suksuk zo ding hi. Tua pilna leh hauhna te' hangin zogam leh zomi-in cidamna leh tawldamna ngah lawh ding aa, leitungbup tawh liangko kikim zo ta ding hi.

Tua hunciang a hih leh 'Pasion' zat minam a hih keh, thupha ngah minam' ih ki cihcih te, a bat laklak ih-hi nawnkei ding aa, Pasion' hong zat-taktak leh hong thupha piak taktak te ih-hi ta ding hi. Tua bang dinmun tun zawhna pen gualzawhna taktak a hihi. Mi gualzo, Pasion' zat leh thupha ngahmi khat suahzawh na dingin zuihtheih ziau ding 'LAMDAWT' cihbang 'OMLO' hi.

## *Thului 4*

### **Peter' Nuntakna Pan Sinna Dawl-III**

*I haksatnate sangin a lianzaw Pasianin amah ih muan tawntung ding hong deih hi.*

Huihpi le guahpi kipei-in, Ngabeng Peter' Ngunkuung tuisung ah tum dekta! Gunkuung sunga om nungzuite a vekpi un dipkua pa tau in omta uh. Zankim zinglam naithum kiim hita ahih manin, khimzing bangin cihna ding bangmah om theilo. Lametna khempeuh beita. Si ding maw, hing ding!

Lungamin dipkuatna tawh a kidim kawmkaal uah, a galuah sikha khat galmuh sawnsawn uh! Sikha hi taktak hi acih uh hi napi, a Topa uh na hizaw mawk. Jesuh in laukei un, Keimah kahi hi (Matt.6:50) acih phet leh, Peter in Jesuh hong to phei pah in, "Topa, hih sikha kasak pen uh, Nang nahih takpi leh, hih tuitung tawnin na kiangah hong paisak in" (Matt.14:28).

Pasian pen mihing tawh kibanglo in, a kito thei ahi hi. Mihingte kito lehang kihihin, kivuak kitot tawh kizom hi. Ahi zongin Pasianin, "hong kisin un!" hong ci ngeungeu pa ahi hi. Peter in hi mun ah mihing hihna tawh apiang thei ngeilo ding, tuitung ah pai theih dingin, Pasian hih theihna muh ding lunggulhna leh upna tawh Jesuh hong to hi.

Jesuh in, "hong pai-in" acih ciangin Peter kithawi ngampah takpi aa paithei pah lai takpi hi napi, a kim a pam a tuihual le a lawmte buaipih in a nunghei takteh tui sungah tumsuk diaidiai hi. Peter in "Topa hong hon in" (Matt.14:30) acih phetin Jesuh in a

khutpan kaito in, "upna neupa, banghangin laumawk nahiam" (Matt.14:31) ci-in Peter thuhilh hi. Upna tawh i to ngamna tantan Pasion vangliatna-a kimu ding ahi hi.

Hithu pen Christian khempeuhin a kiza ngei leh a kithei thu ahi hi. A hi zongin, a nungthu leh a sungtawng ah Kha thu lam ah picin zawk nading thu tapi honghilhna (II Peter 3:18) thute kiphawk khalo citciat hi.

## **Peter A Kiteelna**

Andrew leh John te in Tuiphumpa John tangkona tungtawnin honpa hong pai ding cih lametna na nei gige khin uh hi. Jesuh pen Pasion' tuuno ci-in tuiphumpa John in a tangkona hangin Messiah ka mu-uh hi, ci-in, Andrew leh John te in lawptakin Peter kiangah va gen uh hi. (John 1:41). Andrew in hih a sang-gampa Peter, Jesuh kiangah paipih vingveng a, Jesuh in amuh teh, "Aw... Simon, Johan tapa, Cephas hong kicita in ciai (John 1:42). Cephas pen Aramaic pau hi a, Greek in Petros akici Maanglai-in a kikhiat ciang Peter hong suak, 'suangtum' cih nopna kammal ahi hi.

Jesuh tawh a kimu mi a min kikhel hi. Hi pen Pasion teelkhiatna dawlkhatna a ngakhka mita ding ahi hi.

Lai Siangtho siamte in Peter kiteelna dawldawl in na khen uh hi. Dawlkhatna aih leh, hih a tunga igelh, a sanggampa Andrew tungtawnin Jesuh tawh a kimuh cilna thu hi aa, dawlnihna-aihleh Galilee tuilii ah Andrew tawh a unau un Nga bengin a om laitak un, Jesuh in va mu aa, "hong zui un, Ngaman panin Mimante" kong suah ding hi (Matt. 4:19) acihna thu hi-in, a dawllhumna pen, Jesuh mahmah in a nungzuite samin, 12 teelkhia-aa, sawltakte cihmin avauhna thu ahi hi (Luke 6:13-14).

Tua Peter kikhelna dawllhumte dung zui-in, Peter nuntakna pan thusinna dawllhum ila ding hi.

## **Ngabeng Peter Ki-ap**

Galilee tuilii ah Jesuh Pasion thu genin hong om aa, mipi hong kibehlap semsem takciang, a thugen a kizak-kim theih ding leh mipite tawh a kimuh kim theih ding ngaihsutna tawh Jesuh in a

kianga om Gunkuang nihte' omna lam hong naihin, Peter' Gunkuang tungah kahto aa, tuitungah Gunkuang tung tuang kawmsa in thu hong gen hi.

Jesuh in a thugen aman ciang, Peter hong hopih phe-in, "hia tuithukzaw diakna lam ah na Ngeen paai dihve." (Luke 5:4) a vacih leh, Peter in zaan thapaai aa ka paihsa na mun uh ahi hi. Bang mah ka man kei uh hi. Ci-in dawng kik hi. Ahi zongin, themvei khitciang, "Aive... Bangbang ahi zongin, nong sawl aihteh, sinkik pong leng aive..." (Luke 5:5) ci-in a Ngeen paikik hi.

Um hetlo pipi, sawlmanna peuhin a Ngeen a paihkik mawkmawk leh Ngasa a dim a leetin man takpi mawk hi. Hi Pasion nasepna lamdang Peter in a muh takciang, "Topa... ka kiang panin paikhia in, mawhneipa kahi hi (Luke 5:8) ci-in, kiniamkhiatna lungsim tawh a mawhna kitelin Pasion mai ah ki pulaak hi. Jesuh in a mawhna kiphawkin, Pasion kiang ah a ki ap Peter hong naihin, "Laukei-in, tu pan kipan mi na manta ding hi (Luke 5:10). Peter Nga manpa panin Mi manpa kicita-a, a nuntaakna-ahi, a Ngeen le a Nga benna vanzat khempeuh nusia in a nuntakna thak Jesuh kiang zuanin ki apna tawh anung hong zuita hi (Luke 5:11).

Peter in Pasion a tel ciangin kiniam khiat in a ki ap bangin, kiniamkhiatna tawh Pasion khephung zuan aa, nuntakna lui nusia in a thak nuntakna-ahi Zeisu sungah nungtak ding manawhna pen kikhelna dawl nihna ahih keileh Pasionin hong teelkhiatna dawl nihna-ahi hi.

## **Peter Leh Kikhelna Lamdang**

Kikhelna lamdang khat ah Peter teti hong suahna thu khat om leuleu hi. Jesuh in Peter, James leh John te mual tungah paipih to in, tua lai mun ah Jesuh mahmah in, kikhelna lamdang khat hong lak aa, amai sun nitaang bangin, a puante vuuk bangin ngo a, Moses le Elijah zong hong kilangh hi (Matt. 17:1-3). Jesuh in gualzawhna peengkul tumin hong kumkik ni hunciang, thupiang ding Peter, James leh John te tungah a lakkhol nahi gige hi. Hilai mun ah nungzuipte tungah Pasion gennop thu tampi om dingte sung panin, Jesuh pen Israel te' kamsang lian penpen ahi Moses leh Elijah te

sangin lianzaw tham aa, tehpih theih ding omlo hi, cih thu zongh a laknuam hi dingin a uphuaina thu Matt. 17:5 na sungah kimu thei leuleu hi. "... Meilompi hong omin, thakhat thu in awging khat in,"ka lung hong kimsak ka it mahmah ka tapa-ahi hi. Ama thu na mang un!" cimawk hi.

Hi kikhelna lamdang thupiangan in, Peter nuntakna le a Pasion nasepna sungah mun a luah, Peter' khatha-a dimsak tawntung kikhelna teti ahih lam, a sih ma diak a laikhak gelhna tung tawnin kimu thei hi. Peter in "Jesuh Khriis a vangliatna le hong paikik takpi ding ahihna thu konggen tak ciangin, upmawh thu hong gengen kahi kei aa, ka mit tawh mu in, ka theih thu hong gen kahi hi. Vanglian pen Pa in hih Pa ka it mahmah ka tapa hi, ama tung ah ka lungkim hi, ci-in pahtawina-apiak laitak ka mit mahmah tawh kamuh ahi hi. Mual siangtho tungah ka om laitak un, vantung panin hong ging awte ka bil mahmah tawh kaza uh hi (II Peter 1:16-18).

Peter bangin Pasion' teelna dawl nihna-a sangkha khin mite in, Pasion a vanglian pen a lian pen hi aa, tote Topa, na khempeuh aneipa ahih lam, a um ciang bek hilo in, a telcian sinsen dingin Pasionin hong hilh in hong lak ding ahih na thu hong hilh hi.

## **Peter in Jesuh Nial**

Jesuh a dingin a nuntakna-a pumpiak ngam baan ah a up Pa Pasion a mittawh mu in a tel sinsen pa Peter in tua-a uppa Jesuh Khriis na nial ngeilai veve hi.

Pasion pawl a siim khit uh ciangin, a nungzuite tawh Jesuh Olive mual lamzuanin kahto diaidiai uh hi. Khualmial hiaihaita-aa, Jesuh a dingin a nungzuite tawh a omkhop tawpna leh mi gilote khut sungah Jesuh a kipiak ding nitak zong hita hi. Jesuh in "Lai Siangtho sungah tuucing pa kisatlum dinga, a tuute khempeuh kithehthang ding hi, ci-in a kigelh bang ngeei-in, note khempeuh in Kei tuni taakin nong taisan mang ding uh hi." acih ciangin, Peter in, "a maute khempeuh in hong taisan khin phial uh zongin, ken kong taisan ngeikei ding hi. Nang tawh siikhop ding dong ciang ahi zongin kong nusia ngeikei ding hi." Ci-in dawngkik hi. Jesuh in,

"Peter aw... Tuzan mahmah in, Akkhuan ma in thumveitak nong nial ding lamtak phawk in!" (Matt. 26:31-35).

Mihingte in utna le lunggulhna ineih teei hangin, Pasion vangliatna bang vangliatna kineilo in kithaneem mahmah ahih lam Jesuh hong hilh ciannuam nahi zaw gige hi.

Jesuh gen bangin mihing tapa kimanin, kikat kivua in a kibawlsiat laitak, Peter zong mipi omna inn pua lam ah paikhia in, meilum kiang lam hong naih hi. Numei khat in, nang zong Galilee mi Jesuh tawh a kithuah khat hive teh aw..." ci aa, Peter in thalnial pah lel in bangthu gen nahiam theikeng cipheilai mawk hi. A denteh numei khat tawh kituak kha leuleu in," hipa zong Nazareth mi Jesuh nungzui khat hi ei... " ci leuleu mawk hi. Peter in den a-anial mah bangin" ken hipa thei hiaulo... "cikik leuleu hi.

Themvei khitciang, a kianga atu mikhat in Peter kiangah," nang pen huate tawh a kithuah khat hi limlim teh. Na pau daan in kitheilua..." acih leuleu takciang, Peter kiciamin," hia mipa thei kilkel keng" acihphet leh Ak hong khuang petmah takpi hi. Jesuh in Akkhuan ma in thumvei nong nial ding hi acih thu, Peter in thakhat thu in phawklian in, kisikin, paikhia in kap ngeungeu hi (Matt. 26:69-75).

Peter in Jesuh anialna in, mihingte ithaneemna hong kilanghsak aa, Jesuh in tua i thaneemna khempeuh zongh hong thei-in, hong tel sensin ahihna zongh hong theisak hi. Himun ah nang le kei Peter dinmun ah om hile hang, Jesuh anial dingte vive mah ihi hi. Kha Siangtho tawh a kidim Pasion bang nuntakna pumpi kinei zolo aa, thaneemin, zawngkhal mahmah ihihna thu hong kilanghsak hi. Pasion teelna dawl thumna ah a om mi-in, thu le la tuamtuum leh ze-etna tuamtuumte hangin nungtolh khak ding ol mahmah dinmun ah ki om ahih lam zongh hong phawksak hi.

## **Peter Thokik**

Jesuh kihat in, si-in, kivui-in, a thawhkik khit a sawtlo khat in, Peter leh a lawmte in a nusiatsa uh a nuntakna luid uh ahi Ngasabet-tawh kivaakna zong dingin hong kithawi khia ngelngel uh hi (John 21). Zan thapaai-in, Ngeen vawkin Ngasa abet uh hangin khat zong

man kikeuhlo mawk uh hi. Khua hong vakin, ni hong suakto petpet ta hi. Tua laitak tuigal ah Jesuh Khri hong ding hi. Ahi zongin, Peter leh a lawmte in Khri ahi lam thei kikeuhlo uh hi.

Jesuh in hopih in, "tangvalte aw ngasa na man uh hiam?" (John 21:5) avacih leh, Ngasa khat zong manlo in neek ding bangmah neilo ahi lam uh Peter le a lawmte in genkik uh hi. "Aw... tua aih leh, tua na Gunkuang ziat lam uah na Ngeen uh pai dih sin ua... Themkhat beek omkha inteh... (John 21:6). Ci-in, Jesuh in sawl hi. A Ngeen uh hong paai takpi-in, Ngasa kaihkhiat zawhloh zahin Ngeen dimleet in awk zen hi. Tua laitak thakhat thu in John in, "hih pen i Topa hi" ci-in hong awngin, Peter kiang ah gen hi (John 21:7).

Peter ahi leh Ngeen sunga Ngasa awkte tawh buai-in, bang mah za manlo hi. Ngasa teng a kaihkhawm khit uh ciangin, Ngunkuang tuinawllam ah hong hotphei vua leh, mei ngei ah Ngasa emsa in a om baan ah, neek theih lian ding moh minsa zong na omin, Jesuh in "pai vuau... zingan ne khawm ni ei.." cimawk hi (John 21:8-12).

An a neek khit uh ciangin, Jesuh in Peter kiangah: "Simon, hite sang' kei nong itzaw hia?" Peter in, "kong itzaw mah hi Topa" acih khitciang, "ka tuute na vaak in" ci-in Jesuh in dawng kik hi. Jesuh in dong leuleu in, Peter in zong, "kong it hi Topa, kong it lamzong na thei hi." Ci leuleu aa, Jesuh in "ka tuute na cing in" cikik leuleu hi (John 15:16). Jesuh in a thumveina dongh leuleu aa, "Peter...nong it na?" ci-in, dotna thumvei sitset a dot takciang, Peter a khasiat suakin, "Topa na khempeuh na thei hi. Kong itna zong na thei hi." acih teh, Jesuh in, "ka tuute na vaak in" cileuleu hi (John 21:15-17).

Peter in thumvei anial bang ngeei-in Jesuh in zongh amah a it takpi nathu leh a gam a dingin a kizattheih takpina ding thu kipsakna dingin, thumvei mah ana dongh leuleu himawk hi. Jesuh in hong itna bangzah in lianin, bang zah in hong lung himawh a hih lam hong kilanghsak hi.

Jesuh in Peter tawh ki-itna thu sungkhawm in a kimuan taktak uh ciang, Peter kiang ah ama tungah thupi pang ding khat gen khol leuleu hi. "Na khangno lai-in na khawnggak gakin, na utut na ah na pai zialzial thei aa, ahi zongin na khangham ciangin, na utloh penna mun ah hong kipaisak ding hi." Ci-in Peter, Pasion gam a dingin a

kizatzia ding leh a sihzia ding nana gen khol in, "hong zui-in!" ci hi (John 21:18-19).

Teelna (kikhelna) dawlthumna sungah nungtolh in na omkha hiam? Lawhsamin na nungtolhna mun mah ah Topa hong omin, a ma lawhcinna zangkhawm, zeekkhawm ding le nekhawm dawnkhawm dingin nang hong ngak hi. Pasionin amah na it takpina, it mahmah hi napi cin, mihing tha tawh nahih zawhlohna khempeuh zongh na pholaak ding hong deih hi. Tua bangin Pasion tung ah kipholaak in amah tawh itna thu na kikupkhawm khit uh ciangin, amah in vaipuak hong pia in, na theih ngei nailoh thute hong hilh beh ding ahi hi.

## **Pasion' zat Peter**

Tua bangin a nungtolhna mun pan Pasion tawh itna thu a kikum khop laitak un Peter tungah Kha Siangtho kibua nailo hi. Ahi zongin sawtlo khat in hong tung Pentecost Ni tak ciang, Pasionin a kamciamna bangin a nungzuipite tungah Kha Siangtho vangliatna na pia hi (Sawltak 2). Tua ni pan kipanin nungzuipite lungsim sungah kikhelna nasiatak in hong tung ahih manin, Pasion gam a dingin nasepna huhau in nuntakna piakkhiat ding lel-lel thu haksa in ngaihsun nawnlo uh hi (II Cor. 1:9).

Pentecost ni aa Peter thugenna ahih leh langnih ahiam namsau bangin hiamin khauh aa, Pasion Kha Siangtho tawh kidim hi. A it mahmah a Topa Jesuh, utlo pipi-in, launa lungsim hangin thumvei anial kha pa ahih leh, tu in, Kha Siangtho tawh a kidim taktak ciang Pasion hangin lau ding bangmah munawnlo hi. A nuntakna ah bawlsiatna-athuak khak ding lauhetlo in hangsan takin Pasion gam a ding a lutang apia, Pasion vanzat lianpen khat suak khinta hi.

Teelkhiatna dawl thumna sungpan Topa tawh holimin, ama piak vaipuak a ngah kha mite ahi uleh, Kha Siangtho tawh a ki dimna hangun, hangsan takin koikoi a tung uh zongin Topa hoihna bek mah a gengen ding te hi uh hi.



## Peter le Eite

A lauhuai tuithuk Galilee tuilipi sungah tumsuk in sih ding launa sangin, Topa vangliatna muangin ding khia in tuitung ah apai Peter bangin haksat dipkuatna nuai mah ah Jesuh khekhap zui-in, amah a mitsuat sawm te ihi takpi hiam?

Lungzin haksatna, supna baaina leh gentheih lawhsapna tuihual tungah i om laitak i mai ah Jesuh imu kha hiam?

Tua bangin Jesuh enin mai-ih nawt laitak, ikiim ipam thu le leitung thu le la te I lung himawh khak leh sihna guampi sung hong denna thei ahih lam iphawk thei hiam?

Kha Siangtho tawh a kidimma in Peter in Jesuh umin a nungzui aa, it mahmah hi napi, lauhuaina leh bawlsiatna thuakna ding hun a tun ciangin tua-a uppa Jesuh thumvei sinsen anial bangin, na kiimna pam huzaapna hangin Jesuh kitheihloh bawl kha in na om kha ngei hiam?

Kha Siangtho tawh a kidim ciang hangsan takin Jesuh gupkhiatna thu genin a nuntakna apiak ngam bangin, nanuntakna pia ngam ding dongin Pasion a ding hang sanna hong pia Kha Siangtho na sungah a nungta khin takpi hiam?

Jesuh in Nga-man Peter pen Mi-man Peter asuah bang mah in nang le kei, a ma gamzaina dingin hong zang nuamin hong lamen tawntung ahih lam na phawk-khin ta hiam?

Pasion in itna tawh hong teelkhiat nang le kei-in, teelkhiatna dawl thumna dong mah teelna ngah to zo in, Peter bang mah in Pasion' sathau nilhna angh kim dingin I biak Pasionin hong makaih kim ta hen.

## *Thului 5*

### **Kipawlkhopna A Thaneem Sak Thu (3)**

*Akta mangkuan kitutu,  
kilemna-a omkei leh kiamsukna, manthanna piang  
– Zomite' Paunak*

Zomite I paunak 'puakkhop zang, sepkhop liau' cih ahi aa, 'nupa kilungtuak khua khat in zolo' cihte ahi zongin ngaihsun kik lehang, kipawlkhawm aa sepkhopna-a thupi mahmah ahih lam tanglai pek panin Zomite' sungah kithei mahmah khinin, tua thu mah zong na gengen khin uh ahih lam kilangh hi.

Thamlo in, 'akta mangkuan kitutu' cih I pau nak in zong kilemna, sepkhop theihna, leh kipumkhatnate a om keileh, lawhsapna in dawntuah in kimangthang thei ahih lam, pute pate in tanglai pek mah panin na thei khin uh aa, zong na tuak toto kha uh cih hong phawksak leuleu hi.

Ahih leh, tuhun Zomite ih kipawlkhawm theita hiam? I semkhawm theita hiam? Ci-inin kician takin kancianna (research) kibawl ngei nailo kha dingaa, ahi zongin, kam tawh kidongh ziauziau in hi lehang, sepkhop theihna leh kipawlkhop theihna sangin kipawl na tuamtuum tamzaw hi, ci-in kidawng kha ding hi.

Ahih leh, kipawlkhawm aa sepkhopna bangzah taktakin manpha cih tangtawng pek panin a kithei khin khat hi napi hangin, bang thute hangin tu tan vei kipawl khawm aa sepkhawm theihna thahat zolo ahitam, cih ahang tampi om ding sung panin thu thum a tom theithe-in ih gelh suk ding hi.

## **Lungsim bitna**

Google te in nasep lian tampi a neih sung uh ah 'Project Aristotle' a kici khat zong kihel hi. Tua nasepna ii tupna bulpi pen kipawlkhawm aa nasepna-a thahat theihna ding bang kitangsam cih, a zung a zaamin kankhiat theih nading ahi hi.

Tua Project Aristotle panin Company 100 te ii data teng asit na tungtawn un sepkhop theih nading aki tangsam bulpi bang hiam cih amuh khiat uh khat om aa, tua pen 'psychological safety' ci citciat hi. Zolai-in, 'lungsim ngaihsutna tawh kisai bitna' kici thei ding hi.

Tua pen, Google te ii muh khiatna ah, a thusim khempeuh nangawn uh kimuang takin a kigen khia ngam company nasemte' nasepna muhte pen a lawhcing pente hi aa, tua zah donga kimuanna omlo pi-in kipawlkhawmin na sepkhopna-ah lawhcinna leh hunsawt sepkhop zawhna om theilo hi, ci-in mu khia uh hi.

Tua muh khiatna pen hi mahmah hi, kaci hi. Banghang hiam cih leh, thu sim khempeuh nangawn a kigen ngam ding zah dongin mi muanhuai leh mi citak ki om leh, kipawlkhawm aa nasepkopna pen a om to hanhan lel takpi ding thu na hizaw gige hi.

## **Gen ding tawh buaina**

Ngaih ding sangin gen ding lam sang a buaipih zaw makaite' omna mun ah kipawlkhawm aa sepkhopna om theilo hi. Nokia Company pen hun khat lai-in smart phone company lak ah a minthang mahmah ngei khat ahi hi. Ahi zongin, hun khat ciang, leitang kideenna in tu dongin thokik taktak zo nawnlo hi. Mipilte in ahang a kan uh ciangin, bang mah thu lamdang mulo uh in, thu khat bekbek mu uh hi.

Tua pen, a makaite in mipite leh company ah nasemte' ngaihsut piaknate leh thugente na thupi ngaihsut lo uh aa, amau' gen gennop teng leh amau ngaihsutna bekbek mah mi' lak ah a kidawk ding na buaipih zaw uh ahih hang hilel dih hi, cih mu khia uh hi. Hithu tawh a kizawitawn thu khat Aspen Institute ah CEO a sem Walter Isaacson in a gelh khat om hi.

Tua pen Apple company aphaun khia Steve Jobs' tangthu hi aa, ama gelhna ah Steve Jobs a damlai hi henla, a lungsim a kikhello hileh a company uh tu laitak aa zah in mainawt zolo kha ding ahihna thu, heem gen hi. Ahang pen, Steve Jobs zong Nokia company ah makaite mah bangin ngaih ding sangin gen ding buaipih zaw in, sin ding sangin hilh ding a lawp zaw pawl mah ahi hi.

A taktakin ahih leh, ih thusun thu a lutna mun ah thu gen nuam kisa aa, ih aw hong kingaihsakna mun ah ih lungkim hi. Nuam ih sakna leh ih lungkimna mun ah kitut kho in, kiteek tang pah hi.

Tua ahih manin, kipawlkhawm aa sepkhopna a thahat theih nading in, khat leh khat, a diakdiakin makaite in nungzuite' husa pha takin kingah sak ding leh thupi sim sak ding kism hi.

## **Ngakzawhlohna**

Albert Einstein minthang vangvang napi, a tuaci theih nading in a nungah a tawsawn pa kiphawk khalo hi. A nungah a tawsawn pa zong tua thu hangin phu-tom ngeilo aa, zong lungkimlo cih kiza ngeilo hi.

Amah pen Marcell Grossman hi aa, Einstein tawh ETH Zurich ah kancianna-a sem khawm khat ahi hi. 1913 kum ciangin a nasepna uh tawh kisai lai hong hawmkhia zo uh aa, tua panin Einstein a minthang toto ahi hi. Einstein a minthan khit ciangin zong, Marcell Grossman tawh sawt veipi nasem khawm lai uh hi. Hun khat ciang Marcell Grossman zong Mathematician khatin kiciamteh in minthang veve hi.

Marcell Grossman tawh a kilehbulh lian mi khat, a ngakzawhloh thamanin nung deuh mahmah May 2023 kumin thong a kideenna makai khat om hi. Amah pen Theranos a kici sisan sitna company aphaun khia Elizabeth Holmes ahi hi.

A tupna pen sisan themcik la kiau in natna nam tampi tak hun tomno sung leh sum tawm bei takin sit thei ding cih thu hi aa, tua bang lamsang a sem company tuamtuamte' sangin zong tuampianin lawhcing zaw ding cih thu ahi hi.

Tua atupna asia hipah lo napi, ngaklah lua kha ahih manin, sisan a sitna uh pan ahoih theithei dingin ahilo pipi a bawltawm thu le late uh akimuh ciang, thonginn a kideenna ahi hi. Pute pate in 'an min ngaklah gilna' ci uh hi.

Ngaklah luat ding hilo aa, ei hun hong tung ding hizaw hi. Tua bangin min le za ahi a lawhcin ding ahi zongin a kingaklahna mun ah kipumkhat takin sepkhop theihna om thei ngeilo hi.

## **Thukhupna**

Tua ahih manin, kipumkhatin sem khawmin, a lawhcing innkuan, kipawlina, minam, leh gam le lei ih suak theih nadingin a kisan thu le la tampi tak a om ding hi aa, tua a kisan tampi a om dingte sung panin tu aa ih gelh a tunga thu thumte zong a kinawlkhin theilo dingte hi uh hi. Hih thu thum tawh a kalsuan makaite leh mipite omna mun ah kipumkhat theihna pen ahi ding ciang khat om zo mahmah dingin a lamem ih hi hi.

## *Thului 6*

### **Israel leh Bawngnawi le Khuaizu**

*Mainawt nading hong khaktan thute pen  
ih iplah mahmah teng kekkek hizaw thei hi.*

Canaan gam cih kammal ih zak simin Israel ih mitkha in mu aa, hite nih kibang lianlo napi, a kibangin ngaihsutin ih saang hi. Thamlo in, Canaan gam ahieh keileh Israel gam cihte a kigen ciangin zong, bawngnawi leh khuaizu luanna, ahieh keileh khapsa gamnuam kici zelzel hi.

Khapsa gamnuam ahieh keileh bawinawi leh khuaizu luanna cih kammal ih zak ciangin zong Canaan gam ahieh keileh Israel gamte a gennopna hi, ci-in ih ngaihsun pah hi. Tua bangin bawngnawi leh khuaizu ci-in a kisapna leh a maute' nuntak ziate a kituak mah hiam, cih a tomin en ding hihang.

#### **Bawngnawi le khuaizu**

Bawngnawi leh khuaizu cih kammal a kizak masakna pen Lai Siangtho Paikhiatna 3:8 sung hi aa, Pasiandin Moses kiangah agen kammal ahi hi. Israelte Egypt gamah salin a om laitak uh hi aa, Pasiandin tua mun pan lakhia in Canaan gam ah a paipih nopna thu agenna ah azat kammal ahi hi.

Hih kammal pen Moses in Israelte, Egypt gam pan paikhiat nopna lungsim aneih theihna dingun genpihna kammal in a nak zat pipen zong hipah hi. Jew te' rabbi Michael M. Cohen in agenna-ah,

'bawngnawi leh khuaizu' cih kammal pen Lai Siangtho sungah 22 vei kigelh hi ci hi. Pasionin tua kammal a zatna tawh kisai-in Lai Siangtho siam, Jeffrey Tigay in 'bawngnawi leh khuaizu pen tua hun lai a dingin a lim penin a kingaihsunte hi aa, leengla thupite zindona in kizangin, a kiduh leh a kilunggulh pente ahi hi." ci-in gen hi.

Nahum Sarna leuleu in "lei hoih lei pha leh neek le dawn ding kicinna" genna hi, ci-in gen leuleu hi. Irving Jensen leuleu in 'bawngnawi' cih kammal pen 'ganhing nam cin a dingin mun le mual kicing' cihnopna hi aa, 'khuaizu' pen 'khuai leh a zu a vate a dingin singkung lopa kicing' cihnopna hi ci leuleu hi.

Bill Slott a kici mipil khat leuleu in, 'kitangsapnate hong sik ding' cihnopna hi, ci bilbel leuleu hi. Jew te pawlkhat leuleu in, 'nawi' pen 'neih le lam, neek leh dawn kicinna' etsakna hi aa, 'khuaizu' leuleu pen 'nopsakna, daihna, lungdamna' cihte etsakna hi, ci uh hi.

Bangbang ahi zongin, Pasionin bang acih nopna lian hi ding cih, a kitheih lianloh hangin, Gamlakvakna 16:12-14 sung sim le hang zong Dathan leh Abiram te, gamlak ah haksatna thuakin a om uh ciang, Egypt gam ah nuam asak hunte uh a phawkna-ah 'bawngnawi leh khuaizu' kammal mah na zang leuleu uh ahih manin, 'bawngnawi leh khuaizu' cih kammal pen, anuam, neek le dawn ding kicinna, a lim an le tui, daihna, leh khantohna, cihte gennopna-ah na zangh uh ahihna kician mahmah hi.

## **Bawngnawi leh khuaizu luanna mun luah theihna ding haksatnate**

Pasian' sawlna om bangin, Moses in Israelte Egypt pan paikhia in bawngnawi leh khuaizu luanna mun zuan dingin genpiah hi napi, Israelte a utlo tampi om tuak mawk uh hi. Jew te' Torah hilhcian bu Midrash Tanchuma sungah, "Pharoah kumpipa in, Israelte' kiangah paikhia mengun, na paikhia meng kei uh leh, ka sih khit ding uh lauhuai hi, ci-in, not khia vet hi napi, Israelte sehnga suah sehkhat ding bang bek pai khia ding utin lawp uh hi." Ci-in kigelh hi.

Ahi thei ding ahihna khat ah, Israelte Egypt gam ah salin om uh a kiciah hangin, Egypt te in sal dingin lei uh cih thu kiza ngeilo aa,

thamlo in tua mun ah Israelte mihau milian tampitak a om ding uh ahi hi. Paikhiatna 1:11 sung sim lehang, Israelte hun awng a neilo dingin nasep a kisawlina kimu thei aa, hun awng nei un hileh, amau a ding na semin hau semsem ding uh cih, Egypt te a launa huhau khawnguh hikha dingin uphuai hi.

Thamlo in, tangtawng pekin Egypt gam a uk dingin Joseph omngei khin aa (Pian. 41:41-43), Israelte in tua munah inn le lo nei ciat in, inn nasem nangawn tawh om uh hileh kilawm hi (Pai. 3:22). Ganno tuamtuum zong hau uh aa (Pai. 10:24-28) tua hun a dingin, hauhna taktak ahi hi. Cidamna tawh a kituak a lim a tui zong a nezo lua uh hi-in (Gam. 11:4-6), Pasion mahmahin a hausak ngiat nahi gige hi (Thkn. 8:18).

Jew te' rabbi khat ahi Joseph B. Soloveitchik a kici pa' gelh 'Slaves to Pharaoh in Egypt' sungah zong Israelte Egypt gamah a suaktalo uh hilo aa, ki ukna (political) zui-in, sila-a kici hizaw hi, cih lamin gelh hi. Hiteng bang ih ngaihsut ciangin, Israelte Egypt gamah nenniamna leh haksatna-a thuak tampi tak om kha mah dinga, ahi zongin nuam asa mahmah zong tampi tak mah omlua ding uh cih, uphuai mahmah hi.

Thamlo in, Pasionin bawngnawi leh khuaizu luanna gam zuan dingin a sawl hangin, tua mun ah Canaan mite, Hit mite, Amor mite, Perez mite, Hiv mite, le Jebus mite a teeng piikpeek khin uh ahi hi (Pai 3:8). Tua-ahih manin, tua mite' teenna mun va luah zo ding cih zong, ngaihsut haksa sa mahmah ding uh hi.

Ahi zongin, tua bangteng kawmkaal mah pan Israelte Egypt gam nusia dingin kithawi khia thei uh hi. Canaan gam a lut taktak ding hita uh aa, tua mun ah bawngnawi leh khuaizu na luang takpi ahih lam muta uh hi.

Ahi zongin, tua mun luah taktak ding cih angaihsut uh ciang, a tamzaw lau uh hi (Gam. 13:1- 31). Pasionin tua mun kiluah zolo dingin umin alau mite tua mun mah ah nusia in, hizo ding hi ci-in a laulo mite tawh tua mun luah hi (Gam.14).

Bawngnawi leh khuaizu luanna gam luah zawhna dingin a khaktan thuhaksa tampi om ding sung panin, hite nih pen, abulpi hi dingin ka um hi.



## **Tu laitak Israelte' dinmun leh bawngnawi leh khuaizu**

Tu in ahih leh Israelte in Canaan gam kuam khempeuh a luahzawh sinsen nailoh uh hangin, Pasianin a laulo leh a lungkialote bawngnawi leh khuaizu luanna mun a luah saksak khinta ahi hi.

Pasianin bawngnawi leh khuaizu luanna acihna mun pen singkung na ngawn a po zolo na mun, sehneel gam peuh na hilel dih aa, ahi zongin Pasianin ci, ahih manin bawngnawi leh khuaizu luanna gam, ahih keileh, khangto in nuntakna-a nuam gam hi, cih pah ding mah himai ding hi.

Tua zah khat mah in, sehneel gam pen lonona mun suak khinta in, tuisik siangtho luang khinta hi. Thamlo in, bawngnawi mahmah zong tui siangtho sangin a tawmman zawkna mun tampi om aa, khuaizu zong tawm man takin kileithehi hi.

Ahi zongin leitung bup tawh etkak lehang, 2021 kumin The Observatory of Economic Complexity (OEC) in a ciaptehna-ah, Israel ah khuaizu man pen leitung bup ah a 49 na-ah omin, bawngnawi pen 18 na bangah om ahih manin, tam man mahmah cih ding ahi hi. Israel limlim pen leitungah vanman tam penpen lak pan a 18 na-ah a om laitak ahih manin, Israel ah vanman tam mahmah hi, cih ding ahi hi.

Tua-ahih manin, nuntak haksa in mite zawng thei mahmah uleh kilawm hi napi, tuaci hetlo leuleu hi. Ahauhna, apilna, uh leh a khantohna uh pen Europe leh nitumna lam gamte tawh a kibangin kiciamteh khinta hi. 2019 kum UN Human Development Index ciaptehna ah Israel gam khantohna pen leitung ah a 19 na-ah om hi.

Hi bangin Israel a khantohna uh ih et ciangin, tu laitak aa-a dinmun uh leh Pasian' gen bawngnawi leh khuaizu luanna-a kici kituaklo hi, cih theihna ding omlo hi.

## **Thukhupna**

Bawngnawi leh khuazu luanna gam bangin, anuam, a khangto gam khat phuh zawh na dingin a khaktan thei thu tampi om ahih lam Israelte' tangthu tung tawnin ih phawk hi.

Tua-a khaktan thei thute sung panin, huaihamna leh launa mah a khauhpaï penpente hikha ding, cih zongh ih mu hi. Banghang hiam cih leh, Israelte in Egypt gamah a hauhnate uh a ngaihsut uh ciang, huaihamna lungsim tawh pammaihsa uh ahih manin tuate nusia in Canaan gamnuam delh ding sangin, sila mahin om ding a utzaw tapi om uh hi.

Tua bangmah in tulaitak aa ih dinmun, ih nasep, leh ih sumlut khat peuh ih ngaihsut ciang, kikhenglah thei-in, tua sangin a nuamzaw nuntakna khat haksa takin delh ding ngaihsutin kinei zolo thei hi.

Pasianin Israelte gamnuam luah dingin asawl zenzen hang, tuamun ah mi om khin uh aa, tua mite zong amate' sangin thahatin lianzaw uh ahih lam Israelte in a ngaihsut uh ciang, a tamzaw in luah zawhna ding lampi mulo uh aa, ahizo dingin zong umlo uh ahih manin, lau uh hi.

Tua bang lian mah in, ih mai ah a om haksatnate bangzah in lian cih ih ngaihsut ciang, hizo dingin umlo in, ih lung kia in, zong ih lau mai hi.

Ahih hang, Pasianin a laute lutsaklo in nusia aa, a laulote bawngnawi leh khuaizu luanna gam luahsak veve hi. Lau kei ni. Pasian mit suanin lametna leh muanna nei ni. Pasianin bawngnawi leh khuaizu luanna mun hong luahsak nuam hi.

Tu in, Israel ah diahna taktak a om zawh lian nailoh hangin, leitung bup ah a khangto pen gamte sungah kihel khinta-aa, mun dang gam dang englo in a gam uh ah nuamsa khinta uh hi. Tuamah bangin, bawngngawi leh khuaizu luanna gam apian khit ciang, mun dang gam dang eng nawn hetlo ding hihang.

## *Thului 7*

### **Na Vawh Bangin**

*Tu laitak aa na at khaici,  
na deih bang ahieh keileh  
na vawh khaici na laih hot ding kism hi.  
– Jim Rohn*

Gangaw Zomi Siamsin Kipawlina kum thum cinna mualsuang dingin 'A Manpha Khaici' cih makaite in hong teelkhiat uh pen siamsa, thupi sa in, thangah huai kasa mahmah hi. Thamlo in, thului khat tawh mapang thei dingin hunpha kangah manin zong ka kipaak hi. Hih ih thu bulphuh in, na hoieh sep ding a thupi-na leh tua ih sep ii a manphatna tawh kituakin a gah ki at kik ding, cih upna-a thakin hong phawksak kik kasa hi.

### **Nisimin khaici kivawh**

Sepkhiatna, ngaihsutna, leh thuakna tuamtuam tawh ni simin khaici a kivawh den ahi hi. Mikimin khaici a kivawh den hi napi, khat le khat ih vawh khaici kibang hetlo hi. Nasep hoieh khaici a vawhvawh a om mah bangin, nasep hoiehlo khaici a tuhtuh zongh om veve hi.

Ngaihsutna hoieh tawh kalsuanin tha ala-la tampi a om laitak mah, a kawi vakvak lungsim tawh a nitum tampitak mah om aa; thuakna tuamtuam tawh thupha-a dawndawn tampi a om laitak, thusia-a phukha-kha zongh tawm tuanlo hi.

## **Ih vawh bangin at ding cih upna**

Ih vawh bangin at ding cih upna pen Pasion thu-umta' dingin, leitung thubek ah hilo in, vantung thu dong ahuam khat ahih baan ah, mikim a dingin, theihtheih leh zakzak thukhat hong suak bilbel hi. Vawhna leh atna leitung bei dong om den ding ahihna (Piancil 8:22), ih vawh khaici nam ki at kik ding ahih na (Galati 6:70), leh khitui tawh khaici a vawhte in lungdamna gah at kik ding (Late. 126:5-6) ahihnate ahi zongin Lai Siantho sung mun tuamtuam ah kimu thei kawikawi hi.

Leitung thu ah hih upna a bulphuh masate ngaihsun kik pak lehang, 1822 British Parliament in mipite tungah kamciam piakna in a zatna uh ahi aa, 1884 kumin, USA kumpi dinga mee-kuang lui Benjamin Butler in a mee zonna ah kamciam piakna in azatna-ah ahi zongin, 1894 kumin Profitable Advertising Magazine in laisim mite tungah 'Lungdamna thugen te-in: "na vawh bangin na at ding hi acih mah bangun, na nasepnate uh na tangkona tung tawnun meetna in hong nung zuih ding cih upna tawh suakta takin hih Magazine hong zangh un" ci-in thapiakna-ahi zongin, 1911 kumin, Business Philosopher Magazine in a kizangh ngeinailo paunak thak "gamtatna hoih tuh in, zongsatna hoih at in" cih leh "zongsatna hoih tuh inla, hihna hoih at in" cihte leh, 1965 kumin, leitung ah minam kideidanna beisakna ding siksian in longphona-a makai Martin Luther King Jr. in a thugenna sung khat ah: "minam kideidanna bang hun ciang hong bei ding? A sawtlai diam? Sawt nawn peuhmah lo ding hi." Bang hang hiam cih leh "na vawh bangin na at ding hi." Cih bangin Pasion' thu-um mite' sung leh apua lam mite' sungah a kibangh in 'ih vawh bangin at ding' cih upna in hong huzap to suak ahi hi.

## **At kik ding bek laminin khaici vawh huailo**

Khaici manpha-a vawh mi-in, a vawh khaici tawh kituak thaman-manpha-at kik ding cih upna-a om teeisam hangin, atkik ding bek lametna tawh khaici hoih vawh huailo hi. Tuabangh lametna bek tawh khaici manpha a vawh mikhat a lamet bangin a

gah a-atloh hun ciang, thaneem thei dinga, thamlo in, tua bangin lametna tawh khai ci manpha vawhna (nasepna khat peuhpeuh) pen, na hoih sem (sepna) kici theilo aa, ngahkik ding lametnatawh a sem ahih manin, summetbawl na tawh kibangh lel ding hi.

Tua mah bangin, abeisa hun aa-a vawh khai ci ginalote hangin, gah ginalo at khak ding bekbek alau mikhat zongh amah leh amah lung-gim a kiguangan hilel ahi hi. Tua-ahih manin, at kik ding bek laminin khai ci a vawh mikhatin lungnopna gah at ngeilo dinga, a vawh khai ci-ii a gah zongh, summetbawl na tawh kibangh lel ding ahih manin, mannei nawnlo hi.

## **Thukhupna**

Nahoih sep ding cimtak kei ni! Khai ci hoih vawh ding cimtak kei ni! Tuni a ih khai ci manpha hi. Gah hoih at ding bek lunggulhna ciang lel tawh khai ci hoih vawh ding pen, I khai cite manpha lua ahih manin, pammaih hi.

## *Thului 8*

### **Goliath Na Thatnuam Hiam?**

*Aw...kong gennop khat omlai ei!*

*Nang leh nang cik mah hunin ki neumuh kha ngeikei-in.*

*Mihing khat in tuabangh in ei leh ei ki muh ding hilo hi. Nang leh nang na  
ki muhna tungtawnin, mite' pi muhna na ngahthei bek ding hi, cih kei'  
upna ahihi.*

*– Anthony Trollope*

Vatican khuapi ah a om Biakinn pi khat ii kongvang tunglian ah lim golpi khat kisuang hi. Tua lim pen, limsuaisiam Michael Angelo' khutma-ahi hi. Tua lim gamla pi pan ki galmuh thei-in, mi khempeuh in zongh hoihsa in etlawm kisa ciat hi.

Tua lim sungah migol mahmah khat, sik lukhu khu in, akhut leh akhe tengzongh ki daalna lum tawh aki tuamcip, a kawngah namsau hoih mahmah khat asiat, akhut langkhat ah haa anei veva thaltang saupi khat tawi-in, akhut langkhat ah thalkawng gol veva khat atawi, a hat-tuak mahmah mi gol veva khat om vemvam hi.

Tangvalneu khat in tua migol mahmah pa zawhthawh bawl mahmah vial in, a nungzang pan siksian veva deep hi. Akhut langkhat tawh tua migol veva pa-a sampan kai veuvau in, akhut langkhat tawh a namsau dok in, tua mipa' gawl a bantan sawm lian laitak, aki suai, limhoih mahmah khat ahi hi.

Tangvalneu khat in migol mahmah khat namsau tawh agawl bantan dingin kithawi piatpuat cih bel uphuai phalo hi. Tua lim kisuang ahieh leh ngaihsut huai mahmah sam! 'Naupang khat in

galkhawhang that' cih tawh ki bangh phialin uphuai hetlo hi. Limsuai siampa in asuaih mawkmawk hilel kha ding cih upmawh huai hi.

Ahi zongin tua lim ahih leh phuahtawm thu aki suai mawkmawk hilo hi. Tuma kum (3000) hunlai pek a thupiang khat aki suai kik ahi hi. Tua hunlai-in Israel te leh Philistine te nakpi tak in ki do uh hi. Philistine te galsiam thei mahmah uh aa, atha uh zongh muanhuai thei mahmah hi. A diakdiak in a muan asuan diak uh ahi, a thahat diak leh a picing diak khat omlai sawnsawn hi. Israel te ahih leh galhang leh galsiam omlo uh ahih manin, Philistine te in oltak in a zoziau ding uh ahi hi. Hih thu hangin Israel te dah mahmah uh hi. Philistine te zo hetlo ding cih thei uh ahih manin, lau mahmah uh aa, ling kekeuh bek uh hi. Tua hun laitak, galsim ngei ngiatlo, gamsungah tuute peuh cingin ahun abei sak den, tangvalneu khat in Philistine te' galhang penpa, kihta hetlo in thah ding ngaihsun hi. Tua tangvalneupa kuamah in muanglo hi.

Kuamah in a muan hetloh laitak mah in tuucing tangvalpaahi, David in, galhang Goliath thatzo hi. Galhang penpa Goliath thatzo ta ahih manin, David ahih leh a minthang vangvang hi. Mite in:- "Sawl in atul in that! David in a tulsawm in that!" ci-in pahtawi ziahziah uh hi.

Nang ee, galhang Goliath na that nuam hiam?

David in Goliath thatzo zenzen kei leh Israel te guallel in galte' khutsung ah aki ap uh akul ding ahi hi. A zawhngap ngiatloh uh leh a kihtak ngiat uh Goliath athah khit uh ciang ahih leh Israel te 'gualzote' suak ziau lel ta hi.

Gualzawhna dingin Goliath thah loh phamawh hi. Amah that masa lo in gualzo te ki suak theilo ding hi. Na gualzawh nop leh na thah loh phamawh hi. Na thahnop taktak nakleh na thatzo lua ding hi. Na that nuam takpi hiam?

Na thahnop taktak leh tua na thah ding Goliath pen:-

## **A ki hatsak Goliath**

Philistine te in a muan asuan uh Goliath ahih leh aki hatsak mahmah khat ahi hi. A tu'n pi (9) val bangh sang pahphot in, atha

cingin agol mahmah khat hi a, galkap sungpan khangkhia-ahih manin galdo zia zongh siam mahmah hi. Zongh hau mahmah in a puansilh leh a lukhu te tamman mahmah a, mi mawkmawk in neih zawh ding hilo hi. Apuan gihna bekbek Shekel tulnga gik in, a teipi zat ahih leh Shekel zaguk bang gik hi. Hau lah hau, hat lah hat ahih manin, ki liansak in ki hatsak mahmah hi. Amai ah mikhat in alumte puaksak in, a zahtak mahmah uh ahi hi. Israel te kihta hetlo ahih manin zingsang simin to den hi. Israel te in ahih leh a galmuh phet un laukhin pahphot uh a, a-aw azak naak ua leh ling kekeuh in bu diamdiam uh hi.

Israel mite lau in abu diamdiam amuh ciang Goliath ki hatsak semsem hi. Zawhngap semsem ahih manin ni (40) sung tawntung Israel te zing leh nitaak in to thapaai hi. David in hih thu atheih ciang, kumpi Sawl kiangah, "hih mipa hangin na nasem te patau sak kei-in, keimah pai-in ka vado ding hi..." cigiap hi. Kumpipa in David kiangah, "hilo hi... hih Philistine pa' langkhat ah nading zokei ding hi. Nang pen tu'n tangval na hipan a, amah ahih leh a tangval a kipan gal a dodo ngei mikhat ahi hi." Aci hi. David a lungsim omthei tuanlo ahih manin kumpipa kiangah:-

"Ka pa' tuute ka cinna panin, humpi neelkai ahi a, vom ahi zongin ka thatlum ngei khin hi. A maute in tuuno te amat uh ciangin, a nungpan delh in ka vatgawp zeel a, a kamsung tungsa tuuno tampi te ka honkhia kik ngei hi. Humpi neelkai leh vom te hong zosak Topa in hih Philistine pa' khutsung pan zongh hong honkhia ding hi." Aci hi.

Tua ciangin kumpipa in David upna liansa ahih manin, " paiin! Topa in nang hong ompih taken!" ci-in paisak hi. David pai-in, guamsung atu'n ciang suangmai tangnga tawmin, a tuucin thungip sungah tuate akoih hi. A sailing tawikawm sa in Goliath do dingin guamsung pan mualtung lamzuan in kahto hi.

Goliath in zongh David kiang hong naih hi. Ki do dingin a kinaih mahmah laitak un, David in a thungip sawk in, suangtang khat la-a, akap leh Goliath taltang khalian hi. A taltang ah suangtang tum mitmet ahih manin, galhang Goliath khuptuk buah ta hi.

David in Goliath athah na dingin lum leh tei zang selo hi. Thauvui thautang kism hetlo in, hatna tha leh ngal zongh kism



sak sese lo hi. Agawl a bantan na dingin namsau nangawn kenglo ahih manin, ama namsau puak mah tawh Goliath ki bantan ta hi.

Aki hatsak mahmah Goliath ahih leh tangvalneu khat in suangtang khat tawh kaplum ziau hi.

A thahat Goliath thahzawh na dingin 'thahatna' kism lo hi. Pasion' ompih na leh zawh ding upna lungsim bek a kism hizaw hi. Gualzawh matutna ihngah theih na dingin hong huh thei hetlo napi ihmuan khak leh ihsuan khak theih thapaai thukhat in 'thahatna' ahi hi. Thahatna ahi siamna leh hihtheihna anei te in tua te hangin gualzo ding kisa kha uh ahih manin kisaktheih pih mahmah laideep uh hi. Tua mah bangin thahatna a neilo te in zongh, thahatna tawh gual a kizo thei ding sakha uh ahih manin lam tuamtuam tawh thahat ding hanciam ciat uh hi. Ahih hangin thahatna leh ki hatsakna te tawh gual kizo theilo hi. A taktak in ahih leh gualzawh theihna ding a kism masa thu in, ih thahatna te suanglo in, ki hatsak na lungsim khempeuh nusia-a, Pasion muanna tawh hangsan-na ih neihna hangin a gualzo ding te ih hizaw hi. Gualzawh ding hanciam in gal na do na sungah, ki hatsakna ahi 'Goliath' na thah khit ciang bek in migualzo na suak theipan ding hi.

## **Lum le tei a Muang Goliath**

Aki hatsak mahmah Goliath in a thahatna muan leh suan in aneih khitciang, lum leh tei te tawh kithawi lai hi. Sumngo sik lukhu khu in, sikpuan silh gipgiap hi. Akhe te ah sumngo ngaltuam bulh in a liangko tungah sumngo teipi khai lai hi.

Goliath in galmai samai ah alum atei te in a dalzo ding sakha hi. Gal asim taktak ciang ahih leh tua lum leh tei te in na hungzo tuanlo hi.

Goliath mah bangin leitungah mi tampi takin gualzawh nading lum leh tei te muang tawntung thei uh hi. Pawlkhat in hauhna lum leh tei te atawi laitak, pawlkhat in pilna lum leh teite pei ziahziah uh a, pawlkhat te leuleu in siamna tuamtuam lum leh tei-in zangin ki suvik ki tovik uh hi.

Gualzawhna taktak ahih leh tua lum leh tei te' tungah kinga lo mawk hi. Solomon kumpipa pil mahmah ahih manin tuni dongciang

amah zah in apil omngei nawnlo hi. Pasion in atuam vilvel in apiak ngiat khat ahi hi. Solomon in tua Pasion' piak a pilna tawh agam uk in daihna phutzo hi. Hun hong bei toto in Solomon a muhia hong kikhel toto hi. Apil' semsem ding lung-gulh ahiah manin gam tuamtuan pan zi tuamtuan la kawikawi hi. Pasion a up a muanna hong bei diaidiai-in, alum leh atei ahi apil a siamna teng hongsuang tektek hi. Apil a siamna asuan tektek tawh ki zui-in, a ukna gam kisia tektek hi. Pasion piak pilna tawh Pasion' ciansa gam aphut ding kimlai, phelnih phelthum suaksak zawsop hi. A tawpna-ah amah ngiat zongh a lungkia cipta in, "...na khempeuh a mawkna pi..." ci maita hi.

Moses leuleu asuan a muan ding lum leh tei nei ngiatlo hi. Pilna lah neilo, siamna lah neilo in hauhna lah a neihloh banah, apau ol in apau awk khat hi sawnsawn lai hi. Pasion in zangin, ama'n zongh Pasion bek mitsuan hi. Tuathu hang bek in Israel mite makaih in Canan gam zotpih zo hi. Tua banglian mah in tanglai-in thugensiam in a minthang mahmah, Demosthenes zongh apau awk khat ahi hi. Thugen in a dincil lai, mi khempeuh in zahpih in a nuihsat ziahziah uh ahi hi.

Tuma kum (70) hunlai-in, laigelhsiam leh gualhuaisiam in a minthang mahmah khat omngei hi. A sepna khempeuh ah gualzawhna ngah in, mi khempeuh in zongh it hi. Tua mipa-asuah phetin a tuaci pah hi peuhmah lo hi. Lum leh tei bangmah neilo hi. Mizawng innkuan sungpan khangkhia hi. Zingsang tungin Bawngnawi zuak zeel in, asum ngah sunsun tawh sang akah mikhat ahi hi. Nuntaak haksatna tampi tak thuak kha toto hi. Tua-athuak haksatna te hang mahin, thugensiam leh mite' it khat a suakzo hizaw hi. Thugensiam leh laigelhsiam in minthang vangvang in, a laibu gelhsa te Lai Siangtho zah in hoih kisa zen hi. Mi tampi takin phattuam lawh in, pilna leh siamna baan ah cihtakna ngah lawh uh hi. Tua mipa, gualzo in a minthang den hi. Hih miminthang pa in ahiah leh lum leh tei zat ding neilo hi. Tua mi thaneem, mi zawngkhal mipa pen 'Dale Carnegie' ahi hi.

Gualzawhna lampi tawnin apai khangno khempeuh in, ih lung-gulh tawntung gualzawhna picing ihngah theih na dingin lum leh tei te in honghuh zolo ding hi. Sihna peuh hong tunpih zawsop

thei ahih manin, tua lum leh tei te suahkhiat photphot ding kisam hi. Lum leh tei a muang Goliath a ki hatsak mahmah laitak in, David in, "Topa in namsau leh teipi tawh a hotkhiat lohna thu hilai a-a om mikhempeuh in atheih nading ahi hi." Ciziau hi.

David cih banglian in lum leh tei te in Goliath hung zolo hi. Hong hung zolo tua lum leh tei te muan khak denna lungsim thah phot limlim ding kisam hi. Gualzawhna taktak ih ngah theih na dingin lum leh tei muanna lungsim ahi 'Goliath' thah loh phamawh hi.

## **Israel te a Neumuh Goliath**

Goliath ahih leh a thahat in alum atei te muanhuai mahmah ahih manin, amah leh amah zongh ki muang mahmah hi. Aki dopih ding Israel te ahih leh amah zah in a thahat leh a muanhuai omlo hi. Tua ahih manin Goliath in Israel te thusim vetlo hi. Neumuh mahmah ahih manin Goliath in:-

"Galdo dingin bang hangin hong kuankhia ngam nahi uh hiam? Tu ni-in Israel ulian te kongto hi. Ih kido theihna dingin mikhat hongpai un. Alel zawzaw sila in ih kila ding hi." Ci-in zahko in otsan lualua hi.

Israel te tangvalneu David in azaak ciangin, ado dingin kuankhia pah hi. Goliath in amah that dingin apai David amuh ciang, thusim vetlo hi. Zahpih mahmah lel ahih manin, "Ui hongsa-a ciangkang tawh sat hongsaawm nahi hiam? Ka kiangah hongpai-in! Huihlak vasa te leh gamlak gamsa te' tungah nasa kapia ding hi." Ciliang hi. Tua bangin Goliath a ot buabua laitak, a neumuh mahmah David in suangtang khat tawh kaptuk ziau maita hi.

Goliath in ki letsakna tawh gualzo zolo hi. Ki liansak in, amah zah in a thahat lo Israel te neumuh mahmah hi. Israel te in amah athat zo dingin ngaihsun thei vetlo hi. Amah leh amah hi kisa in midang te a neumuh mahmah laitak, tua a neumuh te mah in amah thatzo ziau mawk hi.

Tuma kum (2000) val hunlai-in, Rome gam ah naupang elbawng khat omngei hi. A lawmte in neumuh in, selnoh niloh thei hi. Simmawh mahmah uh ahih manin, a utut na uah hawlsuk hawlto

lel uh hi. Tua naupangneu hong tangval to in nidang tawh kibangh nawnlo hi. Thugen siam mahmah in galkap maangkhat zong suakto zo mawk hi. Nidang a, amah a simmawh mahmah a lawmte in hopih ngampha nawnlo uh hi. Amah ah kun dendan in pai uh a, acih bang bangin gamta demdem ta uh hi. Tua mipa-ahih leh ki niamkhiat in, itna nei a, hehpihna bulphuh in nahoih tampi sem toto ahih manin a minthang semsem hi. A gualzawhna leh a minthan na teng mah a hazat manun mi gilo Marcus J. Brutus leh a lawmte in thatlum ta uh hi. Tua mihoih pa asih hangin, tunidongciang amin sithei nailo hi. Nungta tawntung ahih manin Julius Caesar ci-in, mi khempeuh in ki samsam lai hi.

1788 kum pawl in galkap sang khat ah naupang khat ki simmawh mahmah hi. Tua naupang kum (16) kim pha in lai thei vetlo mawk hi. Amau khan ah mi (65) om uh hi. Laivuan simin a (64) tungsiaha ngahto zo ngeilo hi. Lai theilo lawmlawm ahih manin a lawmte in neumuh mahmah uh hi. Simmawh mahmah uh a, thu omlo pi khawngin vua gawpgawp thei uh hi.

Tua mihai pa in hong hanciamin, hunkhat ciang General Bonaparte ngahzo hi. A sangkah lai ua-a simmawh mahmah a lawmte in a khutnuai ah nasem ta uh hi. Amah ah kun dendan in, zahtakna apiak diamdiam loh uh phamawh ta hi. Tua mipa-asepna-ah citak in galkap galdo zia zongh kiva mahmah ahih manin pahtawina ngah toto hi. Tuni ciangdong mah Napoleon Benaparte ci-in ki gengen lai hi.

A lauhuai mahmah 'Goliath' ahi, ki letsakna lungsim pan hongpiang, midangte neumuhna lungsim in, gualzawhna hong ngahsak theilo hi. Tua 'Goliath' in gualzawhna ngahlo thamlo in, sihna thuk lai hi. Midangte neumuhna pen guallehna bek hilo in, totcilna hong thuaksak theilai hi. Tua-ahih manin midang te neumuhna lungsim ahi, a lauhuai 'Goliath' thah loh phamawh hi. Tua in ih gualzawh nading a thupi pen thu ahi hi.

## **Pasian a Theilo Goliath**

Goliath tawh kido dingin David a kuankhiat hun laitak in, "Hih dawibia mipa pen, ka tuucin hunlai a, ka thah zelzel vompi leh

humpi nelkai te tawh kibangh lel ding hi.” Ci-in, lau ngaihsut peuhmah lo hi. David in abiak Pasion’ vangletna tel in, dawibia khat in vanglian Pasion zo ngeilo ding cih theilua ahih manin hangsan takin a kithawi khia ngam ahi hi. David in a-up a muan mah bangin Goliath thatzo hi.

Pasion a theilo Goliath ahih leh ahat mahmah hangin, Pasion’ mite zozo tuanlo hi. Pasion theilo in Pasion tawh kithuah lo ahih manin, naupang khat nangawn lelziau a, gualzawhna ngakhia lo hi. A thahat in, a mipih khempeuh in a muan asuan pen khat ahih ha’ng, amah a ompih pa vanglian taktak lo ahih manin guallel veve hi.

Aki hatsak mahmah Goliath in lum leh tei te muan leh suan in nei-in, vanglian Pasion na khempeuh bawlin a neipa ahih leh phawk kha hetlo hi. Amah leh amah hi kisa in ki muang mahmah a, a namsau, a teipi leh a teikhawh te tawh Pasion mite that dingin kuankhia hi. Tua laitak in Pasion a muang mipa in:-

“Nang nahih leh lum leh tei tawh nong kuan hi. Ahih hangin kei kahih leh a vanglian Topa, nangma ngap pa’ mintawh kongkuan hi. Tu ni-in Topa in ka khutsung ah nang hongpia ding a, kei mah in nang hong sat-tuk in nalu ka tan khia ding hi. Huih lak vasa leh gamsa te in na luanghawm ne ding uh hi. Bang hanghiam cihleh galdo na pen Topa a’ hi a, amah in kote’ khutsung ah note hong pia ding hi.” Ci-in kuankhia hi.

David in acih mah bangin Goliath lu lazo takpi hi. Pasion a thei mipa in Pasion a theilo mipa tuancil gawpta hi. Bangzah takin ih thahat phial zongin, Pasion ih theih kei leh gual kizo ngeilo ding hi. Pasion kihello hihna in gimna leh sihna hong tut zaw ding hi.

Tanglai-in Pasion a theihloh na hangin a nuntaak sung tawntung haksatna tawh a kidim mikhat omngei hi. Sabeng te in sa abet uhciang, a sukdelh a todelh uh bangin, tua Pasion a theilo pa, ki sukdelh ki todelh kawikawi a, bukna ding neilo in khua ulsa kaai-in, gimna tawlina tawh kidim cip hi. A inn nangawn ah om ngamlo in, nuamtak in zongh ihmu ngeilo hi.

Hi bangin lungkhamna leh launa tawh a tai kawikawi khit nangawn ciang, kum (8) sung bangh thongsung ah kikhum lailai hi. Tualai pan a suahtak khith a sawtlo in, mi khemkpeuh in a ki lipkhap

mahmah na mun ahi cybiria tuikulh ah kipuak leuleu hi. Tualai mun a tungkha mi peuhmah, mi (10) lak ah (1) nangawn a cidam ding haksa in, a kisi lianlian na mun ahi hi. Tua tuikulh ah kum (4) sung vingveng lemet bei-in sih ding bek maingat in om hi.

A nuntaak sungin zi nihvei nei hi. A zi masa tawh ta khat neiin, kum (4) sung a kiteen khith uh ciang' tuapnatna tawh azi si hi. Kum (40) aphak ciang zikhat nei leuleu hi. Tua-azi zongh 'sihoihlo' natna vei-in, bangmah sem zolo in om hi. Tua-a zikik tawh tapa khat leh tanu khat nei uh hi.

Hi bangin a nuntaak hunsung khempeuh lunggimna leh buaina tawh a kidim den, Pasion a theilo mipa ahih leh Joseph Stalin ahi hi. A nu leh a pa mizawng mahmah khat hikhin sawnsawn hi. Anu in amah bangin azawn ding leh a gentheih ding phal hetlo ahih manin, a tapa Stalin, Pasion nasem khat asuak dingin thungetna tawh a-apap ngei ahi hi. Lai Siangtho sang zong kaksak in kum (7) sung tawntung Pasion' thu asin ngeikhin khat ahi hi.

Ahi zongin, Stalin in, Pasion' thu sinsin napi nuntakpih lo in, up leh muanin nei theilo hi. Pasion' thu-um theilo bek thamlo in, 'Pasion omlo hi' cilai hi. Hi bangin Pasion theilo in Pasion omlo hi a cipa-ahih leh leitung ah a nuntak sung limlim in zongh haksatna, gentheihna leh lung-gim guallelhna tawh ki dim hi.

Pasion theihna in gualzawhna hi. Pasion theihna in minthanna hi. Pasion theihna in lei leh van hauhna bucing ngah theihna-ahi hi.

Gualzawh ding hanciam in ih kalsuan laitak in Pasion ih theih leh ih theih loh ih ki sittel ding kisam mahmah hi. Goliath ahih leh a thahatna leh alum atei te muanhuai-in khauhpa a, vanglian mahmah napi, Pasion tawh nungta lo in, Pasion theikha lo ahih manin, guallel veve hi. Pasion theihlohna in guallelhna hong ngahsak in, sihna nangawn hong tunpih hi. Gualzawhna ih ngah theih na dingin Pasion theihlohna-ahi 'Goliath' thah loh phamawh hi. Tua khith ciang bek in ih gualzo thei ding hi.

## *Thului 9*

### **Na Dahciang Kaplel In!**

*Ei le ei kikhemna sangin a lianzaw kikhemna dang omlo.  
– Eric Hoffer*

April kha sung, Monday ni khat, khuapha sitset in-nitaang silsial hi. Tua nitaang silsial nuai ah ka it mahmah kapi te nih tawh nuamtak in ka holim khawm uh-hi. A zingteh, Tuesday ni; upmawh-hetloh pi-in ka it mahmah kapi khat in hong sihsan vat mawk! Bangmah kam ki vaikhak na ommanlo pi-in hong nusia vat ahih manin ka khasiat dan kigen zolo hi.

A zingteh, Tuesday ni; upmawh-hetloh pi-in ka it mahmah kapi khat in hong sihsan vat mawk! Bangmah kam ki vaikhak na ommanlo pi-in hong nusia vat ahih manin ka khasiat dan kigen zolo hi.

Ni dangin ahihleh khatvei teitei teh dahna leh sihna hongtung ding cihthu ka ngaihsun thei zelzel hi. A hi zongin tuabang thute thakhat in hongtung vat dingin a ngaihsun thei vetlo kahi hi.

Kap nuam mahmah ingh... Dah mahmah ingh...

Ahah-hang' ka khitui malkhat mah atak-khiat ding ka lungsim in khensat zolo hi. Ka nute ka pate leh ka sia te in: "Pasal ihcih pen khasia pahpah lo-in, akap mawkmawk lo te ahi hi..." Ci-in thu hong hilhna te uh ka phawk kik-kik hi. Ka mit-tui luangin kakah khiat khak ding laulua kahih manin adah vetlo bangin ka om veva deep hi. Kap lo ding, kap ngiatlo ding!!! Ci-in ka lungsim tawng pan tha ka lala hi.

A sawtlo in Hanmual-lam zotna dingin hun ki bawl diaidiai ta hi. Ka dahna, ka khasiatna te' hangin aluang ding kamit-tui kadaal daal thapaih na hangin ka gim-mahmah ta hi. Khuapih tuipih te leh khuaveng meltheih te hongtung litlit in, kapi' kiangah kap ngeungeu uh-hi.

Amau te' kah kamuh teh, ka kaksuak semsem napi, kap ngiatlo ding cih ka khensat tinten hi. Mi tua zah lak-ah pasal pipi kap lawmlawm hong ki cih ding ka ut hetkei hi. Pasal kahih manin a kap hetlo kahih lam a maute ka theisak nuam mahmah hi.

Ka Uu, kapi' kiang naihtak in tu khinkhian aa, akiang uah kapi a kipuak khiat nading kibawl lingling hi. Tua te ka muhteh ka lungsim tamzan didek hi. Ka pi ka it mahmah hiven! Aman' zongh kei hongit mahmah, keitawh ki gamla in a-om ding nangawn alungnuam ngeilo, hong mitsuan ngaungau ka pi hi aa, tu'n sihna in hong khenkham hita. Cih thuteng a banban in ka ngaihsunsun hi. Tua ka ngaihsut thute lah sigaal hongpai te in hong theihpih hetlo uh!!!

A nunung pen vaikhakna nei dingin meltheih tengin kapi' lupna lam zuan diamdiam uh-hi. Ken' zongh amau nung zui-in, ka pi kiang ka naih a, a nuntaakna-a-om nawnlo ka pi' maitang ka muh teh leitung ah kadah penpen hun hongtung taktak hizen maw, cih kaphawk hi.

Kei adingin ka pi kamuh tawpna hita!!! A sawtlo in daainawl ah kivui-in, a tawntung in a kimu ngei nawnlo ding himai! Cih ka ngaihsut-teh ka lungtang nalua, ka cihna ding meltheilo in kasan bialbual hi. Ka pi' luang-gei ah ka innkuan un kam vaikhak dingin ka pai uh-hi. Kum (15) kiim phapan kahih manin, ka pi ka neh ngam vat kei hi. Ahi zongin ka nu in kalu pan hongpom in ka pi' kianglam hoihtak in hong naihsak hi. Ka nu' khut kiptak in kaleen aa, kakah khakloh nading kaki-ip tentan hi.

Ka pi' mai-ah ka khukdin petpet uh teh ka khitui a luangkha lodeuh lian bekmah ahi hi. Ka nu in ka pi' khut hong leensak in ka pi kam vaikhak na nei hi. Misi te' khut lennei nailo kahih manin kalau giauguau hi. Ahih hang' ka pi ka itna hangin kalau na hongveng hi.



Ka pi akhut avot didek simloh kei hong khoih ngeina mah banglian lai hi. Ka nu ka nunghei leh kah cihtak in nakap ngeknggek hi. Ka nu' kah ka muhteh, ka pi ka it baanah kanu mahmah zongh hehpih-huaisa kahih manin kakah hongsuak mahmah hi.

Ka nu hehpih lua kahih manin, tutna khat ah ka paipih hi. Veng leh pampan meltheih te khat khith khat in a dahna thu-uh honggen lingling uh hi. Kei zongh amau' hong hehpih na leh ka pi a itna hangun ka lungdam na in, kamai a tai zawhna ding hanciam in kazum nuih hiuhau pong hi. Banghang hiam cihleh, pasal ihcih pen, alungsim khauh, a kap dingin a kilawm hetlo hiven!!!

Tua nitaak sung tawntung, ka lungsim ka hihtheih zahin ka khauhsak hi. Ka mit-tui luang ding hong kithawi teh cilvalh liangin kadaal vanvan hi. Pasal pipi kap buanglo ee!! Kap zenzen lengh mi thupi lo, mi meidawi pi hiding hivengh!! Ci-in kei leh kei ka lungsim ka khauhsak thapaai hi. A zingteh, ka nu in zingsangtung in hongphong hi. Maan (limlang) mai ah ka ki en aa, kahloh ding mah ka khensat zo saam hi. A dah mahmah ka nu tha apia ding kei hingh aa!!!

Biakinn ka tun' uhteh misi puakna Mawtaw vom sungpan ka pi' luanghawm hong ki lakhia in, biakinn pi sungah ki lutpih liailiai hi. Ko innkuan ahieh leh ka pi' luang-gei ahi, a mai penpen ah katu uh-hi. Hun kipat ma in ka sang-gam ka nu ka pa te ahieh uh leh alungsim uh ip zolo in kap ngeingai mai uh-hi. Kei kahih leh kap ngiatlo ding, cih khensat in ka om tentan hi. Bang hang hiam cihleh pasal cih pen kap mawkmawk lo ding, lungsim khauh vailo lua...

Thuhilh (sermon) pa hong dingto in, ka pi a damlai thute; ka pi mi thupi ahiehna zia leh midik mihoih ahiehna zia te abanban in honggen toto hi. Tua tak teh kahloh phamawh in apiang ding daan himai ta hi. Thuhilh sia pa in a thugen te hongzom to in:-

"Ih pi pen alungsim hoieh, migi, itna nei-in, atu ata te akhual ngaungau khat ahi hi. A innsung leh abeh aphung sungah itna-anei mahmah khat hi aa, hehpihna-anei tawntung nupi khat zongh ahi hi. A diakdiak in, atu te naak it phadeuh kasa hi. A nu leh apa te naseem dingin apai khiat khith simin, atu te itna tawh hoihtak keemin khoi aa, a lungkim theihtheih na dingun ciamnuih pih niloh hi. A tupa in zongh a pi' itzia tel ahieh manin, a pitu' un nuamsa in apai na

peuh uah kizui kawikawi mai uh-hi. A kikhén ngeilo pitu te ahi uh-hi." Ci-in mipi' mai ah thu hong-gen takteh; Aw... ka pi' damlai aa, ka omkhop hunte uh anuam pen hitah maw? Cih ka pawk-kik san hi. Tuk hun teh ka pi tawh la kasin khop hunte uh, phalbii hunteh ka inn-nung ua mualdung tengah ka pi-in hong kimawl pihpih hunte khat khat khat ka mitkha-ah hongsuak daudau hi.

Ka nuntaak hunsung anuam aa kangaihsut hun khempeuh ka pi tawh ka om hunteng lian hi zen!! Tu in aman' hong nusia ta!! Ka lungnop nading om ngei nawnlo ding!! Cih te ka ngaihsut sut teh kiip zo nawnlo in, kakap khia beba mai ta hi. Ka dahna leh ka khasiatna zia kuakua' muh ding lau zo nawnlo in, hong ki neumuh ding zongh phawk-khak in ka nei man-nawn kei hi. Bang hanghiam cih leh, kasep dingin akilawm khat ahih lamzongh athak in katel cian theita hi.

Ka pa in kakah-hongza in, a-ang ah hongpom khat-teh, ka nih un kakap ngeknek mai uh-hi. Ka nu leh ka Uu zong leitung ki tamzaan ding zah dongin kap zuazua mai uh-hi. Tua hun laitak in Pasion' mai ah kei leh kei-in kamciam khat ka pia hi. Nidang teh Pasion in suan leh khak hongpia in, tu leh ta katawi khak zenzen leh, kasih ma teitei in, kamkhat ka vaikhak hamtang ding hi. Tua ka vaikhak nop kammal pen: "Pasal hoih, pasal thupi-ih cih te pen, kineih khem ngeilo uh-hi. A dah uh teh kapngam in, a lungdam na uah anui ngam te ahi hi." Ka cih sawm hi.

Kei a dingin ahih leh lungkim tak a ka vaikhak, ka it mahmah ka pi ahih lam phawk theita kahih manin, ka lungnuam mahmah ta hi. Ka pi ka it mahmah na, itlua kahih manin asih teh kadah mahmah na, dah mahmah kahih manin kakah ding ka ki-ip zawhloh na... Hi teng khempeuh ka pi' tungtaang ah ahong uap mi khempeuh in thei uh ahih lam telta kahih manin, ka lungsim khat nuam zawdeuh ta hi. Kei leh kei a kikhem hi nawnlo, hangsan tak in ka lungsim sungah kathuak thu bangin a semkhia ngam pasal khat kahih lam zongh ka ki phawktheita hi.

## *Thului 10*

### **Thumaanna Thukhun Pawlkhat**

*Thumaanin a gamta mite lungmuangin om ding uh a,  
a zuautat mite ahihleh puk ding uh hi.*

*– Solomon*

- Abraham Lincoln in, 'thumaanna in hong suaktasak in, cihtheihna leh nopsakna hong pia ding ...' cih kammal laidal khat tawh gelh in a lukhu sungah pua tawntung.
- Denmark kumpinu Caroline Matilda, thongkia in a omlaitak, thongkong khak tungah laigelh in, "Aw... ka Topa-aw, midangte minthanna na piak laitak, kei thumaanna hong pia aw..."
- Martin Luther King Jr. thongsungah bawlsiatna thuakin a dah mahmah laitak hopihna 'aw' khat zavat in 'Luther... thumaanna-ah dingkip in... nang tawh ka omkhawn den hi...' Luther in a Dairy bu sungah gelhin, nuntaakpih ding hanciam pah.
- Erich Kessinger (Policeman) in, a maiphiatna inndeit tungah 'Tuni thumaanin gamtat ding hanciam ning'cih laimal gelh in, zingsang a nasep kuankhiam ta in sim den.

Nang ee...thumaanin gamtat ding vei bangzah hanciamin, na kisin ngei khin? Tua thumaanna hangin ee, bangzah vei lawhcinna ngahin, bangzah vei bawlsiatna na thuakkha ngei khin? Thumaanna

leh cihtakna etsakna-ahi Phualva tawh a kiciamteh Zosuan khat na hihna hangin ee, thumaanna na kisialhpih ngam na?

Nisim nuntakna sungah a thupi p penpen khat ahi thumaanna nuntakpih theihna dingin leitung thukhun tuamtuamte sungah a kigelhlo thumaana-thukhun pawlkhat na om hi.

### **Thukhun (1): Ei Le Ei Hikisa Photphot Ding:**

Ei le ei hikisa theilo in, kihawm thawh niloh na pen thumaanna pan pialkhiat baih penpen na khat hi citciat hi. Ei leh ei ki zumpih ngamlo, ihihna khat peupeuh hoih kisa theilo, eimau hihna ciangciang mah tawh na lianpi a kistem thei ahih lam mangngilh kha in, mipil, mi melhoih aa kipan, mi cithei khat peupeuh eng-gawp kha in, a mau' hihdan peuh guksak nuam in ki peisuk kipeito kha mawkmawk thei hihang.

Tanglai-in Boston khuapi ah phim peuh, setkhau peuh a kipan van nengneng zuak in, a kileh kawikawi den khat om ngei hi. Tua mizawng pa Dr. Thomas Savage in a muh ciang, hehpih lua ahih manin, a nuntaakzia dong niloh hi. Hi mizawngpa, a gentheih mahmah hangin, a mah le amah hikisa mahmah lel in lungkim mahmah ahih lam, Dr. Savage in a theih ciang, thupi a sak mahmahna thu gelh kik ngei hi. Hi mizawngpa in, 'a zi mi thumaan mahmah khat ahihna, a ma sum muh sunsun in a nek khopkhop uh sikzo lel a hihna, thumaanlo in gamta ngeilo a hihna le a tate mite tawh a kibangin pilsinsak zo veve ahihna' hithu teng hangin, a lungkim mahmah lel ahihna thu gen mawk hi.

Ei le ei i lungkim theih ciangin, thumaan ding hahtang pi-in hanciam kullo in ki nuntakpih zo ding ahi hi. Tua mah bangin, ei le ei i lungkim theihloh ciangin, thumaanna tawh a kigamla siatna le gamtatnate in hong huzap pah hi. I hihna ciangciang tawh I tup thu khat peuhpeuh a taksuah sak zo theite ihi hi.

### **Thukhun (2): Maipha Ngahnuam Lua Lawmlawm Lo Ding:**

Cornelius Vanderbilt in "mi lawhcing khat ka suahtheihna pen, midangte kihta khuankhuan lo in, a uanglua in maipha ka ngah nop

luat lohna hang ahi hi.” Ci-in gen-ngei hi. Hi mipa mihau in a minthan ma, a kithuahpihpih a lawmte ahi Charles Morgan leh Cornelius Garrison te mihaupi vive hikhinta uh aa, a maute’ sawltakin a va ki-ap ngei ahi hi. Sawltak dangte maipha ngah ding leh a pute’ lungkim ding lung-gulh lua kisa zuau a khemnuam tawh, a mah a kipahtaak ding a ut manin, a kianga-a naseppih khat peuh a gensia pheiphei tawh, kituhteh zelzul in a omlaitak Vanderbilt ahih leh om khinkhian ahih manin a naseppih khempeuh in hawmthawh in, gensia niloh uh ahih manin, mai zumin Cornelius paikhia vingveng hi. Cihna ding mel theilo pi mah a mah leh a mah sumbawl dingin a kipatkhiat giap leh mihau khat suakzo veve hi.

Khatvei BHP (Metal le Mining) Company ah Director a sem Paul Billton kiangah nasep siaute’ sungpan, kipuahphat ding a kiasm, a kikhial mun penpen bang thu om hiam? Ci-in thukante in va dongh uh hi. Hih Director pa pen a minthang mahmah khat hi-in, a ma kiangah nasep asiau mi 60,000 valbangh thu a dotna tungtawnin ‘Nasep Ngah Theihna Ding Lampi Nam (6)’ cih laibu zongh a hawmkhia ngei khat ahi hi. Hih mi minthang pa in: - “Nasep siau in hong paite in a naak khialh mahmah uh thu khat om: tua pen, a taktak thute gen ngamlo zaw in, nasep ngahloh khak ding lau luat manin, thu a donghte’ hoihsak theihtheih ding ngaihsun in, a taktak ahilo phuahtawm bekbek a gen tam mahmah mawk hi.

Midangte’ lungkimna tungtawn aa, maipha ngah ding lunggulhna tawh zuau pipi a gen liang te, kua’n nasep pia nuam mawk ding.” Maipha ngah nop luatna leh pahtak ding utluatna sangin thumaanna khahsuah baih zawkna ding thudang tam nawnlo hi.

### **Thukhun (3): Hong Kitelkhialh Ding Laulua Lo Ding:**

Geoffrey Bull in a mission sepna mun Tibet gamte’ pianthak ding a nawngkaaisak penpen thukhat in, ‘U le nau sung kitelkhialh ding laulua thu.’ Na ci hi. Hi gam pen Communist te’ upzia leh Buddhist te’ upna in a huzaapcip hi-in, Buddhist makaipi Dalai Lama bangh pen Pasian zah in a ngaihsut uh ahi hi. Themcik zongh hehsak ngamlo uh aa, a ma cih bangh bangin a gamta khiankhian uh

ahi hi. Piangthak khatpeuh omin hileh, tua piangthak khat hangin a makaipa uh ahi aa, a innkuansung uah ahi zongin, kitelkhialhna-a omding a launa hangun, a piangthak ding zah piangthak theilo ahih na thu Geoffrey a genna ahi hi.

I lawm ih gual khat leh i zahtaak mikhat peuh tawh kitelkhialh ding i laumanin, sepding a kislam khat peuh kislam ngamlo thei-in, seploh ding pikhat zongh lah kislam kha buatbuat thei hi. Mikhat peuh tawh kitelkhialh khak ding launa sangin, thumaan thutak palsat khak ding a lauhuai zaw tham ahih lam ki phawkkhalo thei hi.

Abraham Lincoln in kumpi ngah ding cih thu a kigen ngeingai ciang, Kentucky pan a tanaute khat in sik-khau satin hibangin gen hi. "Lincoln... kumpi ngah ding ci-in hong za ing. Ka lungdam mahmah. A zenzen in kumpi na ngah takpi aleh hualai aa, na lawm nihte mangngilh kha hetkei o. Minister ciang bang peuh mah ngahsak hamtang thei lecin kilawm mahmah ding hi ei!" Lincoln in, "Nong thugen hoih mahmah hi. Ahi zongin, kei pen, kuamah tawh kithuhkik ding lamem in na ka sem ngeikei hi. Tua mah bangin, mikhat peuh in, hong huhna hangin zongh a maute' tungah kisuangtaak in, hong telkhialh ding uh a lau ding zongh ka hikei aa, kuama hong ukna sungah omlo in, thumaan thutak sung bek ah om ding ka ngaihsunzaw hi. Tua hi-in, tua ka lawmte (2)te in zongh, Minister sep theihna ding hihna kicing a neih naak vua leh a ngah ding uh hilel aa, tua ahih keileh ka cihtheihna ding om tuanlo ding hi." Tuni dong ciang a khekzo ding a omlo dawnna namte ahi hi.

Thumaanna hangin hong kitelkhialh khak ding lungchimawh khakna bekbek pen thumaanna pan kalkhat paikhialhna hita hi.

#### **Thukhun (4): Lunggulhna Uangsak Lualo Ding:**

The New York Times thukizaakna-a neipa George Jones kiangah Tweed Ring Companyte in hi bangin huhna ngengei uh hi. "bangbang hi-in, hithu ah nong huh keeikaai zawh ding a lamem ka hi uh hi. A hoih pen dingin nong sepsak loh aphamawh hi ungh. Hiah sum \$100, 00, 00 kong keng thei uh hi. A vacih vua leh Jones in: "Hih nasepna pen sumlut ding lunggulhna ciang bek hilo in,

thumaan thutak khelkhiatna ahi hi.” Tweed Ring Company in, thumaanlo in sum a zeekna hangun, a thusim uh a kitheih khak ding lau in, Jones kiangah a va zuau pih ding huhna-angetna uh a lawhcinglo uh suak hi.

1999 kumin Sun Valley ah a kibawl sumbawl makai mithang teng kimuhkhopna-ah Warren Buffet in hi bangin thu gen hi. “Deih luatna leh lunggulh luatna in, sep loh ding pi hong semsak thei hi. Minthan nop luatna in, tualniamna hongtun thei hi. Hauhbaih nop luatna pen muipeei manlang lua bang aa; a hiciang khat tawh lung kimthei-in, ngak hithiat theihna pen sumkuang engine tawh kibangh hi.”

Lunggulhna-a uangluat ciangin thumaanna in mun ngah thei nawnlo hi. Lawhcinna dingin thumanna letkip a kulna nuai ah lunggulh luatna khiap den ding kisam hi.

## **Thukhun (5): Thumaanna In Gualzo Den Cih Mangngilh Lo Ding:**

Prof. Kam Za Mung in “thumaanna tawh kalsuanin, Pasion’ deihna bangin nuntaak ding a hanciam mikhat, a daupai theilo leh a lawhcing theilo tawh a kibang phial zongin, anunung na-ah thuhoih leh thupha mah tawh ki tuntuah veve hi,” ci hi. Khatveivei ciang, thumaanlote peuh daupai zaw in, thumaan tentante peuh daupai theilo zaw uh ci-in, kingaihsun kha thei hi. Ahi dingtawh kibangh napi, na hisuak hetlo hi. Epicurus in: “Thumaan thutak a nuntaakpih lo mi khat in cik mah hunin lungnopna kidapphah lawhcinna ngah ngeilo ding hi.”

Hau mahmah in a minthang mahmah ngei, J. Cooke, kum (25) a phaklaitak, a daupaina khempeuh in taaisan in sumh dipdeep mawk hi. Lungkia lo in, a kipat kik zelzel leh, khatvei ciang hong hau mahmah kik zo miao hi. Tua bangin a hauh kik ciang, a sumbatna mun 3000 val ah leeibaa loh in pai ngekngek hi. Hi bangin a hauh kik theihna mikhempeuh in theinuam in, lamdangsa ciat uh hi. Ni khat, sumbawl’ a lunglut mahmah tangval khat in, teldot ngiingei hi. Mihau khat suah theihna ding leh, supna baaina panin lawhcin kik theihna dingin, bangci kalsuan ding ihi hiam? a vat cih

leh J. Cooke in; “hih na theihnop thu pen kei a dingin lamdang lo thukhat ahi hi. Bang hang hiamcih leh, ka nu leh ka pa’ tungpan ka ngah zongsatna hoih khat hang hilel hi.

Tua zongsatna pen thumaanna hicitciat se hi. Mihingte in i sungtawng ah i theih baanloh hihtheihna khat ciat kinei aa, tua hihtheihna leh thumaanna gawmtuah in hi peuh lehang, hunkhatciang a ki lawhcing cih ding hilel hi,” ci-in “ei America gamsung ah hih bangdan zongsatna neileng mi lawhcing a suakziau ding kitam mahmah hi. Thumaanna tawh nungta in ‘na’ khat limlim sep ding a thupi himai.” cih san hi.

Louis XIV in Colbert kiangah, “Frence gamzah in alian leh a minthang-gam pawlkhatte ki ukzo napi-in, bang hangin Holland zah a-aneu gam pawlkhatte leuleu ki lazo hiaulo thei ahi tam?” a vacih leh Colbert in “gamkhat ii a thahatna leh a muanhuaina pen galkap tam neihna leh galvantam neihna himasalo in, thumaanna nuai ah kilungtuahna leh cihtaknate hang hizaw.”

Thumaanna thukhunnuai ah minuamsa gam, minam le mimal a suak dingin lunggulhna lianpi anei ihi hi.



## *Thului 11*

### **Kihhuai Mun pan Siangtho Mun Ah**

*Jesuh' maisak zawhloh mawhna cih bang omlo.*

A kih-huai phadiak aa ih ngaihsut, numei-pasal vai ah gamtat siatna-ahi paktatna sungah kidiah in a pumpi mahmah uh a zuak ngei numei minthang mi nih tung tawnin sinna khat neikhawm pak leeng cih lunggulhna nei-ing. Facebook ah lai tam kisim zolo in, video leh photo lam tam ki enzo zaw ahih manin, hun tampiak a kul hetlo dingin, a tom thei penin hong kai khawm ing. A kicing zaw a thei nuamta dingin katbeh theih na ding anuai ah etkakte hong guang ing.

### **Crystal Bassette**

Nadia Hilton cih mintawh paktatna video kilakna-ah kineih siam semin ahauh lawh ngei khat ahi hi. Kum khatin a sumlut \$300,000 bang hi-in, inn hoih penpen, Mawtaw hoih penpen leh Club minthang mahmahte ama min tawh anei ngiat khat zong ahi hi. Ahi zongin hite hangin lungkimna angah zawhloh na thu thu kidotna khat ah gen ngei hi.

Kum 16 aphak laitak gin neihloh in gaai-in tapa khat neivat ahih manin, a vakna ding leh amakaihna ding a lung hihmawh luat na lamteng panin hibang dinmun a tung to suaksuak ahi hi. 2014 kumin Mawtaw tuahsia in simliam gige aa, a nak nangawn laih kha hi. Hun khat ciang, a sanggam nu' thuzawhna hangin biakinn lamtung zel in, a tawpna ah Pasion' sapna ngah in piangthak hi.

UPC pastor minthang khat ahi David Bassette tawh hong kithei-in, kingai-in kiteng uh hi. Mi khempeuh in lamdang kisa in thukizakna tuamtuate pan thu ki dongh ziahziah hi. Tua thudotnate sungah:

Pastor David Bassette in “hih Crystal Bassette, hi danga-a paktatna nate hangin ka lungsim in amah kasan zawhlohna khat zong omlo hi. Mihingte mawhna vive tawh a kivakvak hi aa, ahi zongin bangzah takin mawh khin in, imawh lai ding zongin, Zeisu sisan in a siangtho penin hong sawp khin aihna ka nupa un ka up uh hi. Hih a kihhuai gamtatnate hangin zong ka mailam nuntakna uh ah supna leh baina khat peuhpeuh tuak lawh khak ding ka patau kei uh hi.”

Tua mah bangin a zi-in zongh:

“Ni danga ka gamtat siatnate hangin tu in hih bangin a siangtho nuntakna a ngah ka hi zaw aa, Pasion itna aliat zia Tetti apang thei kahi zaw hi. Note’ sangin ka mawhna lian zaw aa, ahi zongin Zeisu sisan hangin note mai ah mi siangtho tangin ama hoihna hong gen ngam kahi hi. Ka mawh ngeinate bei khinta a, a thakin Zeisu sungah ka nungta khinta hi.” Ci-in amah bangin mawhna sungah a omlai mite tungah thapiakna nei hi.

Tu in anupa un ta thum tawh omin, New Beginnings Christian Life Pawlpi ah Pasianna sem uh hi. Amin taktak pen Crystal DiGregorio hi-in David Bassette tawh a kiteen ciangin a lawmpa minla in, Crystal Bassette a kici ahi hi. Amah bang aa, paktatna sung ah a kidiah kha mite gupkhiatna thu genpih ding tup penin nei hi.

## **Shelley Lubben**

Shelley Lubben ci-in a kithei, Shelley Lynn Moore leuleu a neutunga kipan Biakinn kikhop, Church School cihte pai tangtangan Pasion a it naupang khat ahi hi. Ahi zongin, a teenna uh alaih uh ciang Biakinn pai na ding thubaih nawnlo in, TV et hun tamzawta hi. A nu leh apa nasep tawh buai-in, a lunggulhna zah in a nu leh apa in amah enzo lo hi. Hi bang thuteng nungah akihhuai pen mun ahi kizuakna mun tung hi.

Tua mun ah kum 8 val sung paktatna Video/movie tampitak lila in, video a kilak pih mithum tawh naupai lai hi. Khatvei video kila dingin a kithawi laitak, a lungsim sungpan Pasion hopihna khat za hi. Pasionin “Hi bangin gamta nawnkei-in, Shelley aw...” hong ci hi. Ke’n zongh ka lungsim sung pan hi bangin Pasion ka dawng kik hi. “Pasion nang kei hong thudon keiteh.. Ka nu leh ka pa in zong kei hong thudon lo uh hi...”

Tua ciangin, Pasionin: “na haksatna, na thuakna, na vangik khempeuh leh hih na nuntakna mahmah Zesu Khris in sing lamteh tungah sihna thuakin hong tannin, hong puaksak khin hi...” hong ci hi, ci-in, khitui luangin a teci pankikna-ah gen hi.

Hi bangin Pasion hopihna angah hangin, piangthak tuanlo hi. Tua leh, khatvei, Video kila dingin Mawtaw tawh a zitna uh pan tuahsia in si dektak hi. Tua laitak si hileh Hell tung ding ahihna hi bangin genkik hi. “Accident in ka luvai-in ka amcip hi. Tua kawmkawm in ka lungsim sung pan, kei aw.. sitaktak ding maw leh! Kei si nuam nailo Topa, kei si zenzen lengh, Hell tung ding hiveng...” ci-in ka kiko hi, ci-in gen kik hi.

Tua khit, a sawtlo khatin piangthak hi.

Hun khat ciang Garrett Theodore Lubben tawh kiteng in a nupa un Pasion thu sungah nungta in, Pink Cross Foundation cih nasep lian khat semin tua nasepna pan paktatna tawh kisai nasepnate nakpitakin lehdo uh hi.

Hi bangin a pian thak khit nungah, ni danga-a gamtatna luite hangin amailam ama kikhak ding alauna thu hibangin gen hi.

“Zeisu in kei hong tan khin hi. Ahi zongin, na vawh bangin na at ding hi a kicihna om bangin, a beisa ka gamtatnate hangin haksatna khat peuhpeuh ka tuah khak ding ka lung himawh veve hi.”

February 10, 2019 in upmawh loh laitak sivat hi.

A sih ma in, a alawmpa tawh ta 2 aneih khit nungah kikhen kik uh hi. A sih vatna thu a kikat ciangin zatui zat tamlua hi dingin ki um hi. Mi pawlkhat in, a lawmpa pen mi kineih kheem pi khat hi-in, tua teng lel a zatui zang kik hi dingin um uh hi. Zahmawh cancer vei ngei-in, a zahmawh biang langkhak ki at khia ngei hi. Thamloh in, a sih khit ni 5 hal in, a tanu ngak upmawhloh in si leuleu hi.

## **Sinna (2)**

Hi numeite, anih un mawh uh. A mawh ciang bek hikei uh, a mawhna uh a kihhuai penpen a ih ngaihsut mawhna namte hi. Ahih hang, a mawhna uh kiphawkin ki sikkik tuak uh, amau bangin mawhna sungah a omlaite a dingin, amau nuntakna mahmah tawh gentehin thapiakna leh gupkhiatna thu tangko uh. Khatveivei-ih ngeina luite tawh midangte thapiak ding maizum huai bangin a ngaihsun ki om kha thei! Mai zum huai hetlo hi. Pasionin tua dinga adeih hizaw lai thei hi. Mai zum huai hongsa om kha thei dinga, tuate sangin, anuntakna a kikhellawh mi khat om leh manpha zaw tham hi.

Anih un piangthak tuak napi uh, a thupha san zia uh kibanglo hi. Crystal Bassette te inn kuanin thupha angah uh hang, Shelley Lubben te innkuan leuleu dahna in nawk niloh hi. Hi mun ah ih pian thak ciangin leitung thupha ngah pah ding cih bang hilo hi. Nang bangin a piangthak mitampite nuamsa in a om uh hang, nang haksatna in hong nawknawk kha thei hi. Phamawh lo hi.

## *Thului 12*

### **Ezekiel' gen Gog leh Magog**

*Ezekiel aw, Magog gam a om Gog kumpipa  
mawhsakna thu gen in. Amah pen  
Meshek minamte le Tubal minamte a ukpa ahi hi.  
– Ezekiel 38:2*

Tutung Iran in Israel akap ciang, mi tampi takin “Ezekiel’ thugen a tangtung ding hita in ciai” kici aa, Israelte in Iran thukkik ding khensat khin kici leuleu ahih manin bang thu tengin hong zom to ding cih lunglut huai tham khat suak hi. Ezekiel’ thugen a tangtung hi, a kicih theihna pen Ezekiel 38-39 sung a kisiksan hi-in, tua sungah Ezekiel in a bulpi-in a gen thu pen Gog leh Magog thu ahi hi. Mi tampi takin, tua Ezekiel thugen kikan khinin, ngaihsut zia leh muh zia tuamtuan om hi.

### **Gog leh Magog**

Gog leh Magog pen Lai Siangtho (LST) Ezekiel sung thamloh Mangmuhna sungah zong omin, mi pawlkhat in a gennop a kibang dingin gen uh aa, pawlkhatin a kibanglo dingin gen uh hi. Keima mimal in ahih leh a kicingin ka kan zawh nailoh hangin, a kibanglo dingin ka um zaw hi.

Ezekiel’ gen Gog leh Magog tawh kisai-in, 1 Khang 5 sungah Gog cih min nei khat omin amah pen kamsang Joel tu, Shemaiah tapa hi aa, Joel leuleu pen Jacob tapa Reuben’ suan ahi hi. Tua Gog ii suan le khakte LST sungah a kicianin omlo ahih manin, Gog leh

Magog thu a kante in zong, Gog tawh kisai thu tam gen nawnlo uh hi. Ahang a dang khat a om thei ding khat ah, Ezekiel genna-ah Magog pen Gog in uk ding ahih manin, Magog kikan thei peuh leh Gog kankul tangtang nawnlo ci-in a kingaihsun zong hikha mai thei hi. Thamlo in, Ezekiel gen Gog pen min seel dingkhawng zong hi thei ding hi.

Bangbang ahi zongin, Tibet tangthu tawh kisai sungah Gog tawh kizawi tawn tangthu khat om citciat hi. Tua pen, Tibet gam sungah Guge khua-a kici khat om ngei hi, ci-in kigelh aa, mi pawlkhatte in Gog pan apai ahitam, ci uh hi. DNA bulphuhin a kikan ciangin tua khua tawh a kizom diak mite pen Asia nitumna lam kuam ah a tengte hi phadeuh hi, kici hi.

Magog leuleu pen LST mah siksarin kikan ciat leuleu hi. Piansil 10:2 sungah Magog cih kimu in, amah pen Noah tupa hi aa, tuiciin tun khit ciang Noah tapa Japheth in aneih ahi hi. Tanglai, ama hun lai-in Catholic Bishop te lak ah alian pen Johannes Magnus in Magog thu na gelh ngei-in, Magog pen tuiciin tun khit kum 88 ciangin Scandinavia-ah tai-in ta 5 nei hi ci hi. Tua Scandinaviaa kici mun pen Europe gam sung, a diakin Norway, Sweden, leh Denmark kuam teng ahi hi.

Jew mi tangthu thei Josephus leuleu in, Gog leh Magog tawh kisai agelhna-ah, Gog pen kua suan hi-in, ama suante koi ah om cih gelh lo in, Magog thu gelh aa, Meshech leh Tubal te tawh kizom sakin, Japheth suan hi ci-in (Pian 10:2, 1 Khang 1:5 te tawh zong kituak), Thobelites ahih keileh Iberia (Black sea) a kicina munte ah a tengte hi, ci hi. Tua mun aa mite pen hun khat ciang Georgia-a kici Asia nitumna lam leh Europe nisuahna lam ah tenguh aa, Europe lam ate pen Tubal ahih keileh Tbilisi ci-in zong a kithei na mun ah a tengte hi uh aa, tua panin pawlkhatte pen Tobol kici-in, tua min siksarin tua mite tam ateen penpenna khua zong Tobolsk kici hi, ci-in kigelh hi. Tua Tobolsk pen tu laitak Russia gam sungah om hi. Tua Josephus ciaptehna siksarin Meshech pen tulai tak aa Turkey kuam teng hi dingin International Dictionary of Historic Places: Southern Europe sungah kigelh leuleu hi.

Tua hi-in, hih tangthu kiciamtehte leh Ezekiel' thugen, Magog a kici gam sungah Meshech leh Tubal khuapi nih omin, tuate pen

Gog a kici mi khat in uk-in, hun khat ciang amah leh a kibelpawlpah gamte in Israelte do ding cih thu pen (Ezekiel 38:2-6), a kipanpan ta hi, aci tampi tak omin pawlkhat bangin Russia kumpipa Vladimir Putin bang pen Gog hi, ciliang uh hi. Ahang pen Iran, Syria, Turkey, Palestinian, leh Russia, cihte kipawl ding ahah keileh a kipawlpawl khin uh cih theih ding zong suak veve hi.

Hi lai ah, ka lunglut citciat thu: 1 Khang sunga' Gog pen Israelte' khangsimna Jacob suan ahah huhau in Israelte a do kik dingin hi theilo hi, cih ngaihsutna tawh ama khanggui Magog tawh kizomin a kikanlo ahi tam? Ahah keileh, Ezekiel gen Gog cih min pen Magog a uk ding min seel ahah manin, kan kul nawnlo in Magog suante sungah a kihel hipah hi, ci-in a kingaihsutna hang ahizaw tam? Ahah keileh a tunga Magog tawh kisai thute zong, tangtawng aa muhia leh ngaihsut zia a kibanglo gam tuamtuan a omte tungtawnin a kideih kaih kawmkawm peuh ahitam?

## Ahun

Tua Gog leh Magog in Israel a do hun ding pen, Israelte a gam uh ah akikaihkhop khin hun (Ezekiel 38:7-9). Hih hun pen Israel gam a kikipsak hun, 1948 kum panin a kicingcing hita hi cih theih ding khat suak ding.

Israelte amau leh amau kimuangin lungmuangin a om laitak uh (Ezekiel 38:14-16). Tuma kum 20 khawng pan kipanin manlang takin a khangto Israelte tu laitak a dinmun uh leh Ezekiel gen kituak mawhlo cih theih ding khat suak leuleu.

Israel ah ziin ling ding, leitang kicim gawp ding (Ezekiel 38:19). A nungthu ih et ciang, Si Tuipi huhau in kum 130 pan 150 kikaal simin Israel ah ahatna 6.5 ML zin ling zel ahahna kimu aa, anung penpen pen 1927 ahi hi. Tua ahah manin, ei' khang sung, tu zawh kum sawm bangzah hiam sungin Israel ah khatvei zin a liin hun a tung kik leuleu ding cihna suak. Tua ih deih kaih diam aw.

Gog ukna gamte ah khat le khat namsau tawh kithahna om ding, pulnatna om ding guahpi, gialpi, meikuang le kaat kuang, te zu ding (Ezekiel 38:21-22). Hite sung pan pawlkhat piang khin hi kici nuam thei ding.

Tua, Ezekiel gen Gog leh Magog thupiang ding pen gimna lian hun sung hi dingin up huai-in (Ezekiel 39:9), John mangmuhna leuleu pen kum 1000 maanna hunkhit khawng hi thei leh kilawm (Mang 20:7-9). Tua hi-in, Ezekiel gen Gog leh Magog pen sawt nawnlo thei takpi ding tawh kibang.

Bangbang ahi zongin, hi thute a kician sinsenin kuamah in a kigen thei lian ding daanin ka ngaihsun kei aa, ahi zongin hun ngah takin kan man lehang, lunglut huai ka sak bilbel thu khat ahi hi. Ei thu um mite a dingin bel, bangbang apiang zongin tua tawh lungkham ding leh patauh ding bel hilo hi.



## *Thului 13*

### **Nu le Pa Thumang A Nahlawh Peek**

*Nu le Pa' thumang a nahlawh peek  
– Zomite' Paunak*

“Paita o leh boih... Na lampi kihong taken o...”

Sumzong dingin a kithawikhia, kumsawm (10) val deuh bek apha pan, Abd-el-Kader, a nu in, sum tang dangkasan (40) a piak khitciang, a kamvaikhakna ahi hi.

“Thumaanlo peuhmah semlo ding nai maw! Zuauthu genlo ding, ahoihlo in gamta limlim lo ding, na theina? Koi dih sin aw, hiah ka mai ah hong kiciam limlim dih ve, cikmah hunin zuauthu gen ngeikei ning, cidih...”

A nu' sawl bangin, a tapa anu' mai ah a kiciam khitciang, a nu in, “Na ma kihong hen. Cidamin ki mukik ni maw?”

Tangvalneu pa-a lawmte pawlkhat tawh sumzong dingin a kuankhia ta uh ahi hi. Nithum nilii dingkhawng a paikhiat khit uhciang, lametlohpi-in migilote tawh kitalsik mawk uh hi. Migilote in, hi tangvalneu teng a banban in thusit ngekngkek uh hi.

“Sum zong ding hikei ung. Sum neikei ung. Hong hehpih un,” ci-in kitan semsem uh ahih manin migilote in khah deudeu uh hi. Ahi zongin a nunung pen ah a kisit Kader tawh kisai ah hong buaihuai sim pian hi.

“Sum bangzah pua nahia?”

Kader in; “Ka bombi-ipsung ah sum (40) om hi.” Ci-in dawngkik pah lian mawk hi.

Migilote nui ngeingai kawmsa in;

“Kalasa! Uphuai kei vial mahsi! Sum hau zawzeen sicia?” Ci-in nullhnau ngeingai uh hi.

Kader aki thusit sawt sim pian ahih manin, a lawmte lau in a taimang tawh, a bumang tawh, a mah bek om velval laibek hi. Tualeh migilote’ lak ah khat in hong naih phe-in, dongh phakik leuleu hi.

“Sum bangzah pua nahia? Na neih zah a maan takin gen sin aw!”

Kader in zongh, a cihngei bangh mah in, sum (40) bek nei-ingh, a dang nei vetkeng, ci teitei hi. Migilote in umlo uh ahih manin, a makaaipa uh sam uh hi. A makai pipa in;

“Hiah hong paidih sin! Sum bangzah taktak pua nahia? A maantaktak nong gen keileh, hong kaplum ding kahi uh maw” Ci-in, thau khat leh tem khat pei vatvat kawmsa in dongh leuleu hi. Kader zongh lau mahmah ta ahih manin, ling kekeuh bek aa, a-aw kikat kekeuh kawmsa in;

“Hia na nautang nih te’ kiangah zongh ka genkhin hi. Ka bombi-ip sungah ka nu in hong guansak dangka san tang 40 bek om hi.” Ci teitei hi.

“Heih... tua ahih leh a puanteng suahkhiatsak vo!” Ci-in, migilote bopa in a lawmte sam lualua hi. A lawmte zongh hongpai-in, Daker’ silh le teen teng suah khiatsak didek in, a sit didek vua leh, a ip sungah, sum tang 40 mulian takpi uh hi.

“Ha... bang hangin na puakzah lian takpi mah gen lawmlawm mawk nahia, mihai?” Ci-in, migilote in, hai sa mahmah uh hi. “Hibang tawh hau hak si ni cia, mi dangte hileh apuak zah uh sung pan alang ii lang zong gen lo in seel mang uh hiven!” ci-in nullhnau in nuihsan ziahziah uh hi.

Tua leh Daker in; “Himah hi...ka nu’ kiangah zuauthu gen lo dingin, kiciam khin ka hih hang hi.” A cihtak ciang, migilo makaipipa in Kader naih phe vat hi. Kader zong lau mahmah aa, aci ling kekeuh bek hi. Ahi zongin, Kader lau nabanglo bilbel hi.

Migilobopa in “Aw... himawk maw... nangh na nu’ thu hizah aa a mang hizen maw!! Kei zongh nang bangin ka nu’ thumangin, thumaan thutak nuntaakpih hilengh, hi bangin siat gamtat lo kha

mah ding hiveng maw!!” Ci-in, “Naktakpi takin kisik ingh!!” ci khiankhian hi. Tua acih kawmkawmin a khitui tak kekeuh kawmsa in “Kisik ingh, hi kaki sak laitak ahi hetlo kahih lam na gamtatna tawh nong lakkhiat manin lungdam mahmah ingh.” Tua tangvalpa’ sum khempeuh vekin pia kik hi. Migilo makaipipa in a nautangte a vekpi un samin, tangvalpa’ mai ah mawhmaina nget pih hi.

Hi thu pen, a zaknop huai dingin a kiphuak tawm maimai thuleeng khatpeuh ahi ding tawh a kibang hi. Ahi zongin tua bangin a kiphuaktawm thuleeng maimai nahi peuh mah lo hi. Hi tangvalpa, anu’ kam vaikhak bang mah in atuntun na-ah citak in, thumaan thutak nuntaakpih ngiat hi. Hunkhat ciang, Frence te’ ukna sung pan Algeria gam a kaikhia zo pa suak mawkmawk hi. Algeriate’ tangthu sungah tuni dongin mangngei nawnlo aa, kum zalom 19 sung aa’ Algeria gam makai teng khempeuh lak ah a minthang pen khatin kiciamteh khinta hi.

Amah pen 1808 kumin suakin 1883 kumin asi ahi hi. Ahi zongin, anu’ thu amanna huhau bekbekin, mi lawhcing mahmah khat suak khinta ahih manin tuni dong amin amang nawnlo ahi hi.

## *Thului 14*

### **Thumaanna leh Thopi (4)**

*Thumaanna pen tung sunni tawh kibang hi.  
Na kigamla kha thei dinga,  
ahi zongin amah mangthap cip theilo hi.  
– Elvis Presley*

Thumaanlo sepna leh hihna khat peuhpeuh ahih leh siatna in zui pelmawh ahih lam mikimin ih theih ciat ahih sam hangin, kuamah ki thumaan zo nawnlo semsem ta mawk hi.

Khatvei thumaan nuam napi ding, a thumaan zolo nupa khat in Peter khem mawk uh hi. A lo zuakna uh pan a ngah uh sum pawlkhat imin, a langkhat bek ap uh hi. Zuau gen dingin a kipan masa Ananias pum tuk in sipah hiau hi. A lawmnu Sapphira in hithu theilo in, zuau gen ding kipan phei leuleu a, a lawmpa' luang tawh kiphum khawm pah lian hi.

Thumaanna lo tawh nuntakna leh hinna-ah, gualzawhna, lawhcinna, leh cihtheihna cihte kingah theilo hi. Thumaanlohna hangin Ananias te nupa abangh tampi mah a omom kha khin ding himai hi. 'Thumaan thutak' ci-in mi khempeuh a kam uh pan gingging thei teei napi, mun khempeuh ah zuauna leh khemna tawh kidim in, thumaanna hong lengla zo nawnlo semsem mawk hi. Dah huai mahmah hi. Hithu tawh kisai laigelhsiam Orison Swett Marden in agen, thu gentehna khat hoih mahmah in bun mahmah hi.

Khatvei thopi (4) gilkiat dingdeng sa in, an zong ding lengkhawm diaidiai uh. Thopi khat in a limtuak mahmah, a san

hilhial, vokngawi tumkhat mu in, lungdam lua kisa nepah buatbuat. A gil zongh vah nailo pi, tua thopi thakhat thu in pumtuk in sivat mawk. Tua vokngawi a bawlte in chemical tuamtuam tam zangh lua in, tho nangawnin a thuakzolo na hi gige.

Thopi khat leuleu, zingsang an dinga a kibawlsa, athuk tuamtuam leh mangbuh vui kigawmin a ki huanmin; limtuak lua kisa-a gim anam viauviau khat gilvah takin a neek laplap leh sipah leuleu.

A thumna thopi leuleu, bawngnawi bung tungah tuangin a sunga te a dawn kekeuh deep leh, tua nawi sungah leikaang vui a na kihelgawp pi ahih manin, sih lawh zel leuleu.

Hibangin a khasiathuai mahmah, a lawmte khat khith khat a sihngekngkek na, a muh ciang, thopi liina (4) in thukhat phawk vat bilbel. 'Aw... thumaanna om vetlo in, na khempeuh atuh vive, tua pen a ki sihlawh ding himai... nasa lawmlawm ingh... hibangin ka omsang' tu mahmah in sipah vet lengh siangtho zaw ei...' ci-in, a kiana-a om thothahna dinga a kibawl laidalpi khat tungah hong tawlna hi. Tua laidalpi tungah 'thothahna' ci-in kigelh a, tho si liuleu limkhat, a golsim in kisuang liamluam hi. Thopi-in tua laidalpi nam zel, liak zel in a om niloh hang' si peuhmahlo in, a gilvah semsem lel mawk hi.

A lamdang hetlo pi mah nahi zel kawikawi. Tua thoza nangawn, thumaanna kihello in a kibawl, atuh pi mah na hi leuleu zel.

*Thului 15*

## **Na Lungkiat Ciang**

*Na khempeuh te' nungah a om lai lametna.  
– Italian Proverb*

A zenzenin;

Nasep ding a kilawm, a kiasm, a kul leh na ut thu pawlkhat omin, tua thute hanciamin a sem dingin na khensat laitak; tupna kician nei-in, tua na tupna natun zawh nadingin na hanciam ciam laitak...Nang le nang zongh citak kisa, hanciam kisa in, na kisukpek na kitopak laitak mah... Lungkiat hetloh ding khensat in, na lungsim na khauhsak tinten laitak hi napi...

Na lampi kihong thei peuhmahlo, na ma kikhak cip thapaai-in, cihna ding mel theilo in, lamet omvet nawnlo in, na lungsim abei didek ngei hiam? Bangbang hi-in, ka siamna ka hihtheihna leh ka hatna in cinzo nawn peuhmah kei; gualzawh daupai ding leh matut lawhcin ding lamet khat zongh a omnawn peuhmah lo hita ei, ci-in, na lungkia didek ngei hiam?

Tua bang dinmun na tunkhak leh lungkham kha peuhmah kei-in. Banghang hiam cihleh, tua hunlian pen na lungsim hong kisittel (ze-et) hunlian ahi hi. Na nuntaakna sungah mi lawhcing khat a suakzo takpi dingin kilawm maw, kilawmlo? Cih sittelna hunsung

atung lian nahi hi. Tua ahih manin, tua sittelna mun pan, mi lawhcing dingte a tuam ah, mi lawhsam dingte a tuam ah apai uh kul lianin, aki akigual khen loh un ahithe i nawnlo dinmun hita hi. A kikhawl khawmkhat leh lawmta khat nangawn zongh himun a tun uh ciang, a kikhen loh uh phamawh ngiat ta hi.

Tua bang sittelna athukkha lian ngeikhat in a genkikna thu khat ka sim kha ngei hi.

“Nuntak kivak nading nasep khat ka kipatcil hunlai; ka daupai thei peuhmah lo in supna baaina bekbek tawh ka kitalsik hi. Lawhcing ding cih thadah neektawm ding nangawn ka ngahzo kei hi. Ka lunggulh leh ka tup ka sawmte peuhmah tangtun zawh ding lamet om kikeuh nawnlo mawk hi. Cihna ding theilo lunggim sinkhamin zan thapaai ka ihmud theihloh hun ni tampitak hikhinta hi. Hih ka haksatna sungpan bangci hihleng suakta thei ding, cih ka ngaihsutsut hang, ka ngaihsun zokei hi. Tua bangin cihna mel ding theilo in ka gim mahmah laitak, lungkia ding maw, aihkeileh hanciam lai teitei ding? Cih kuamah in hong uk hetlo in, keima khensat ziau ding thu ahihlam ka phawk thei kik vat hi.”

Hi mipa amin Arthur Lynch Williams (A.L.Williams) hi-in, tuahsiatna leh haksatna kuampi sungah tamveipi akiatkiat khitciang, nakpi takin kilamsangin mi lawhcing pen khat leh mi tampi tak a lamsang kik zo mi khatin apiang pa ahi hi.

Bawhlung sia semin kumkhat in \$ 10,000 kim bang ngah zel hi. A ci uh a dam laiteng neektawm ding kicing liamlam teei napi, damlohna khat peuh leh buaina khat peuh atuah hun uh ciang, haksa sa mahmah mai hi. A tate sangah khak kul, a nuteek a pateekte vakin khoi kul, tua kawmkaal ah natna satna in bawm thei talailai. Hi dan haksat na atuah zelzel ciang, a khasum tawh themcik zongh tang theilo ahih manin, a nasep laih dingin khensat hi.

A mahmah bangin nuntaak haksa sa in, cih nading mel a theilo, mi cimawh (85) tawh kipawlin, Life Insurance Company khat phuatkiat ding hanciamin kisukpek kitopek uh hi. A sawtlo khatin, kaamphatna tawh, Company minthangsa khattawh nasep khop ding thukikum khawm thei uh hi. Hi bangin thu a kikup khop theih nading, A.L.Williams in tamveipi ahanciam ciam hi-in, atawpna-ah

niangtui saikhat ah kimu thei-in, thu hoihtak a kikup theih uh ciang Williams a lungmuangin nak nuam mahmah hi.

Tua ni pan kipan Williams in Company minthang khattawh na semkhawm theita ding cih ngaihsunin, a zumnuih simsim zel himai hi. Tua laitak phone kiset in, a zan aa, nasep khop ding vai a kikuppih, mi minthang mahmah pa nahi hi. Williams in, tu ngawngaw in, nasep kipat zia ding hong genuam hi-in teh cih ngaihsun in anuam mahmah deep leh tua mipa in, a mah tawh nasem khawm zolo ding ahihna thu leh, Williams' ngaihsut ziate amau' company ah kizang theilo ding ahihna thugen kik mawk hi.

Hi bangdan haksatna company tuamtuan pan tamveipi atuah ciang lamet bei-in a lungkia didek ngei ahi hi. Tua bangin a lungkiat hangin, nungtolh ding ngaihsun hetlo ahih manin, hun khat ciang leitungah milawh cingpen khat leh A.L.Williams Company ci-in, a minthang vangvang Company khat hong phuangkha zo mawk hi.

Thomas Edison in "mite akhawlna mun pan kei ka kipan hi" ci hi. Daupai theilo, mavang theilo in tuahsiatna leh haksatna vive na tuah leh tua thute in na lungsim bangci ciangin citakin kuhkal ahi hiam cih hong ze-et-et, nahi gige hi. Tua ahih manin, tua ze-etna na zawh kei zenzen leh mi lawhcing a suak zolo ding nahi aa, a lawhcing dingin zong a kilawmlo nahi hi. Tua lai panin a dinkhawl mite khawlsuak suakin, lawhcinna tawh kigamla semsem uh aa, dinkhawlo in a kithawi teitei mite ahih leh lawhsapna tawh ki gamla semsem uh hi. Lungkiat huaipen dinmun ah ih om laitak in hih thu phawk' gige ding kisam aa, ih nuntaakna, a kikhel nading dinmun lian ah a tungta ih hih lam mangngilh hetloh ding kisam hi. Napoleon Hill in "cih nading om nawnlo in ma bingin dahna kuampi sung lian ah gualzawh nading thulaigil a om gige ahih lam a thei kha mite bek a lawhcing thei bek uh ahi hi" ci hi.

Helen Keller na ngaihsun ngei hiam aw? Lungkia ding hileh a lungkia dingin kilawm taktak hiven. Kha (9) aphak aa kipan a mittaw in, khua zongh za theinawnlo hi. A ma-a dingin lamet abei kikeuh ahi hi. Ahi zongin, Helen lungkia peuh mahlo, lamet a omlo pi sung mah ah a hanciam teitei leh Radcliffe College pan buaih la zo mawkmawk hi. Laigelhsiam, laihilhsiam leh mittawte lakah milawhcing pen khat suakzo in a mah banga mitaw mite thapia in



pantah aa, lamsaang kik zo lai mawk hi. Franklin Delano Roosevelt zongh ee, ngaihsun kik lehang. 1921 kum, a piankum (39) aphak laidak, polio natna ngah in, a pumlang zaw suak hi.

Ama tha tawh lam pai thei nawnlo hi. Lamet bei-in lungkiat huai mahmah hi napi, a lungkia hetlo in a nuntaakna lungneu pih hetlo hi. Hi bangin a damloh hun kum (8) bang a cin khit ciang, New York State sung teng a uk dingin kiteel aa, 1932 kum ciang USA kumpi ngah zo lai veve hi. Tua bangin a cidam hetlo in leeng tawh a kisawn kawikawi mi khat hi napi White House ah kumpi semin a om sung khempeuh, a gam makai uliante tawh manmanin kimuhkhopna nei den bek thamlo in, ama sep ding nasep khempeuh zongh ahun zui-in sehsa in koih dimdiamin om khong ngeilo hi. Franklin ahih leh, a pumlang khat ki zangtheilo in, lupna tungah a lup niloh hang, lungkia peuhmah lo hi.

Tua bangin haksatna a thuak laidak, a lungkia in bangmah na hanciam nawnlo hileh, kuamah in kithei kha hetlo dinga, zongh ki thupi ngaihsut kha hetlo lel ding baan ah, damlo pi mahin na tampi a kistem thei veve ahih lam kiphawk-kha hetlo lai ding ahi hi.

‘Lungkia kei-in, citakin, ahun ngaklah ke’n’. Tu laidak aa, na lungkiatna, na thuak haksatnate khempeuh na lungsim hong kisittelna hilel hi. Tua sittelna nazawh phetin gualzawhna-a ngah pah lian ding nahi hi. Hih thu mangngilh hetkei-in.

## *Thului 16*

### **Muvanlai**

*A khawl te'n zo ngeilo in, a zote kawl ngeilo hi.  
– John C. Maxwell*

Muvanlaite pen kum (70) dong bangh nungta thei uh aa, 'Mu' nam sungah sawt a nungta thei penin kiciamteh hi. Ahih hang, kum tuatan a nuntak theih nadingun khensatna haksa mahmah khat aneih loh uh phamawh citciat se hi.

Kum (40) bangh aphak uh ciang, a-an zonna-uh ah a zatloh uh aphasawh 'a cin leh a siak' te uh muih bilbial ta ahih manin, aneek ding uh sa leh ganhing khat peuhpeuh man mengmeng thei nawnlo uh hi.

Kum (40) bangh aphak uh tawh kizui-in, amuk zum uh zongh sah tektek in, tawt tektek ahih manin, neek ding a om sun nangawn nuamtakin ne thei mengmeng nawnlo uh hi.

Kum (40) bang ahih uh dung zui-in, amulte uh zong sah tektek baanah, amei uh zongh giksa tektek in, deih bangin leeng mengmeng zo nawnlo lailai uh hi.

Tua laitak amau a ding teel ding thunih bek om hi. Khatna ah, gimta ing, hici omlel ning, sih ding ngak lel ning, ci ding maw; ahih keileh, anihna ah, ahaksa ta zongin nuntak ding lampi teel zaw ding?

Sih ding ateezawte a dingin bang mah buaihuailo aa, a sawtlo in asi ding hilel ta hi. Ahi zongin, lungkia lo in sih ding teello aa

nuntak ding mah ateel zawte, a thakin khatvei haksa ta leh tha asaan kik kul lian ta hi.

Tua ahih manin, himun panin kikhel ding sangin sih ding a teelzaw Muvanlaite kum (70) dong bangh a nungta thei ding kilam, kum (40) tawh anuntakna uh a mahial uh hita hi. Ahi zongin, haksa ta leh kikhelna manawh ning acite, tua kikhelna phuto in kum (30) bang dam beh lawh uh leuleu lel uh hi.

Kikhel ding a khensatte in, tua ahaksa kikhelna-a zawh nadingun ni 150 val bangh sawt thei hi. Tua hi-in, tua kikhelna kantan ding akhensat Muvanlaite mual sang pen dawn ah hanciamin lengto uh aa, tua mun ah Buu khat hanciam takin lamin tua sungah haksatna tampi thuakin kikhelna-anuai aa bangin angah dongun hanciam uh hi.

👉 An zon nadinga-a kizangh thei nawnlo acin muihpite amuk uh tawh ahi a, suaang tungah ahi zongin a kiat-khiat dong tat cipi-in taat uh hi. Nasa mahmah, gim mahmah napi, a kiat khiat masiah khawlo in taat uh hi.

👉 Acin muihpi teng a kiatkhiat khitciang, suang khauh mahmah tungah a muk uh tat cipi in tat leuleu uh hi. An nek nadinga-a ki zangh thei nawnlo amuk sahpi ahawng khok-khia in, a thak tawh a tuam nuam hizen hi. Gim pipi leh nasa mahmah pipi mah in a kiat dong mah tat niloh uh hi.

👉 Cin thak apo phetin amul sahpi teng tuk cipi-in tutu leuleu. Hi. Amul gikpi hangin deih bangin aleeng zolo hi aa, tua mulsah nianua teng tukhia in a thak apo dong a ngak ding hizen hi.

Hiteng thum a zawh khitciang, muk thak, cin thak leh mul thak hong nei-in, tuate hangin nuam takin an zong thei, an ne thei, leeng thei ahih manin a nuntak hun uh kum 30 bang kibehlap to hi.

Muvanlaite nangawnin nuntak nading, a hih keileh anuamzaw ding, sawt a kimang zaw ding, leh a hoihzaw ding thu khat apian

theih nadingin, gimna tampi thuakin kikhel ding teelzaw thei uh ahih leh en bang hangin teel theilo ding?

Pom dingte pom ngam sawmin,  
Paih dingte paih ngam sawm leeng!  
Puahphat dingte puahphat zawh sawmin,  
Bawlthak dingte hanciam sawm leeng!

### **Theih Ding:**

Hih a tunga Muvanlaite' pianzia pen hunkhat lai-in, min kigenlo khatin Pasion nasem Dr. Joseph R. Nally, Jr., D.D., M.Div. tungah email tawh a khak hi aa, Nally in Lai Siangtho tawh a etkak ciangin a hithei ding thu in mu hi. A hi zongin, Muvanlaite' nuntak zia a kantel kipawlina khat ahi, Arizona Bald Eagle Management Program te a va kikupih leh, tua bang daan theikha naikei ung, ci-in gen uh hi.

Muvanlaite' pianzia ngiat asin (major field) David Mikkelson, Ph.D. in, "Muvanlaite pen kum 30-40 aphak uciang, amul uh sah, a muk leh acin uh tawt etc... pen ahi mah hi aa, pawlkhat te kum 65-70 dong nungta thei uh cih zong ahi mah ahi hi. Thamlo in, Mu nam sung khempeuh ah sawt a nungta theipen hi uh, cih zong ahi mah hi," ci hi. "Ahi zongin, amul leh acin te uh Mualsang tungah kahto in laih cih thu leh hih kikhelna dingin khensatna aneih uh kul cih thute pen up huailo hi. Tua bang ka theikha ngeikei hi." ci-in gen hi.

Bangbang ahi zongin, tu aa-a kigen Muvanlaite' pianzia pen thangah huai-in, zong a lamdangpi khat cih ding ahi hi. Tua ahih manin, Muvanlaite' pianzia tawh thala in, ih mailam ding lametna tawh a thakin thasaan theih tawntung ding kizam takpi hi.

## *Thului 17*

### **Practice**

*Tu laitak zong a kisinsin nahi hi.*

1987 kum, Fargo, North Dakota, USA ah, Billy Graham in a thu gen angai mi 65,000 valte mai ah:

“Lokho nasepna tawh a khangkhia kahi hi. Ka mangngilh theih loh, ka pa in, vantung lam ngato kawmsa in guahzuk nading thungen ngei hi. Kum 7 kum 8 kiim ka phak lai-in, zing sang nai 3:00 satin tho in Bawngnawi suk dingin ka lengkhia den hi. Tansawm sang ka kah ciang, zingsang khat in Bawng 20 ta bangh a nawitui ka suk den hi. Tuamah bangin sangpan ka ciah ciang zongh 20 ta mah anawi ka suk leuleu hi.

Mihau, mipil, misiam, milian, ahih keileh na ut dinmun khat peuhpeuh na tun zawhna dingin, hanciamna ahih kei leh, sepkhiatna na vawh khiat loh phamawh hi.

Billy Graham agenna ah “khatvei, Times Square, New York ah khuata lampan apai tangvalno a gammang khat tawh ka kituak dihdih ngei hi. Koi dan aa, Carnegie Hall sung tung kik thei nahia? Ka cih leh, a khutpi leh a mekaww nihna kituah sakin gingsak laklak kawmsa in:”

“Practice man...practice” Hong cimaww hi. Hanciamna, a kism penpen nahi takpi maww.

Charles Reed in tuma kum zalom khat lai pek in hi bangin gen ngei hi. "Kisinna na vawh leh zongsatna gah na at ding aa,

zongsatna gah in hihna khat hong tunpih ding aa, tua nahihna gah pen na tupna na tunna ding ahi hi." Ci hi.

Orison Swett Marden in "Tawhtang khat tungah Germante' paunak kigelh khat ka simkha ngei hi. Tua kammal pen, na kasep keileh ka kekseu ding hi." Ci-in gen kik ngei hi.

Lord Ellenborough, mizawng mahmah khat hi-in, zu sai khat ah haksa takin sum thalawh ngei hi. Haksa asak mahmah hangin, a lawhcin masiah sep keeikaai dingin khensat hi. Bawlsiatna leh nenniamna thuakin a lungkiat mahmah hun nangawn ciang, a thubulphuh kammal simkawmin lungnopna zong zel hi. Tua a thubulphuh bel; 'Hanciam ding maw, ngawl ding??'

Daniel Webster in apian kum (70) cinna pawl abawl-in, milawhcing khat a suah theihna thusim hibangin genkhia hi. "Ka nuntaakna hiciang ka tuntheihna dingin hong tawsawn vanzat ahih leh cihtakna ahi hi. Lungkia lo in nasemin ka hanciam hi. Khatvei beek zongh a mawkna in kangah moh phengkhat nangawn ka ne ngeikei hi."

America gam makai (Nyaing Ngangyi ) minthang khat ahi Alexander Hamilton in: "Mite in hibangin ka lawhcinna thu a gen uh ciang, a pianpih siamna leh thupha hi, ci thapaai uh hi. A taktak in ahih lebel citak takin hanciamin ka nungkik ngeiloh man hizaw hi."

I vawh bangin a ki at ding hi aa, lungkia lo in na vawhvawh lawhcinna khaici, ahun ciang paak bangin hong palh lel ding ahi hi.

## *Thului 18*

### **Lincoln Tungpan Sinna (4)**

*Pasian aw kong kiciam hi.  
Hih nasep ka semzo takpi ding hi.  
– Abraham Lincoln*

Hih a tunga Lincoln kammal “Pasian aw kong kiciam hi. Hih nasep ka semzo takpi ding hi.” cih kammal pen, Lincoln in tuma kum zalom (19) hun lai aa, mihing le mihing sila in kineihna ngeina a beisak nopna thu a tangko cil lai aa, a Diary bu sungah a gelh kammal ahi hi. A kiciamna mah bangin tangtung sak zotak pi hi.

Sinna: Ei leh ei kimuanna; Pasian tungah kingakna.

“Lincoln... Kumpi ngah ding ci-in hong za ing. Ka lungdam mahmah... Kumpi na ngah takpi leh hualai aa, na lawm (2) te mangngilh kha hetkei o. Minister ciang peuh mah vaihawmsak lecin kilawm ding hi ei!” Lincoln in kumpi ngah ding cih a kizak ciang, Kentucky pan a tanaute khatin sikkhau satin a hopihna ahi hi. Lincoln in: “Nong thugen hoih mahmah. Ahi zongin, kuamah tawh kithuhkik ding lamenin na ka sem ngeikei aa; mikhat peuh in hong huhna hangin zongh a ki suangtaak ding kahi kei hi. Tua hi aa, tua ka lawmte (2) in, Minister sep theihna ding hihna-a neih uh leh ngah ding uh aa, a neih kei uh leh kei’ huhna ding thu omlo hi.”

Sinna: Thumaanna; maitang zahtak neihlohna.

Khatvei Lincolnte nupa leh a naseppih ulian pawlkhat ankuang umm khawm uh. Ciamnuih peuh genin a om laitak un, a thugen khat a zi-in na zadah lua mawk. Thakhat thu in, a dawnlai tuisa tawh a lawmpa maitang theh suk vat. Lincoln in a zi kamkhat zong aw-ngawh kik lo. Na semte hong pai-in, Lincoln maitang, kinulna tawh nulsiang sak uh.

Sinna: Lungduaina; thuakzawhna.



## *Thului 19*

### **Steve Jobs' Lungguh**

*Hun a kiciangtan sungah om nahih manin,  
Mite' a dingin na hun bei saklo in,  
nanga ding mahmah in nungta in.  
– Steve Jobs*

Mi khem peuh in Apple Company phuankhia pa ci-in a kithei, a minthang vangvang mihau Steve Jobs, kum 65 aphak laitak gilpi cancer tawh sihna lam zuanta. Leitung a nusiati laitak, Leitung ah a haupen khat in ki ciamteh. A sihkuan ah a thu gente muibun in, mitampi lungsim sukha. Ama kammal nunungte ahih leh;

Mite muhna ah enhuai in, mihau minthang khat kahih hangin, ka sungtawng ah lungkimna taktak om ngeilo in, hauhna pen a thubek taktak ahih lam ka telta hi.

Ka lupna tungah damlo in ka om ciang, hauhna in kei a dingin bang mah hong sepsak theihloh lam ka phawk kik theipan zen hi. Mawtaw hawl ding mi kicial thei napi, ih natna hong puaksak ding mi ki cial theilo hi. Mihingte in na(van) athak khat peuhpeuh kibawl tawm thei napi, a siat ciangin a ki puah kik theiloh khat om aa, tua pen 'NUNTAKNA' hi citciat hi.

Cidamna thupi ngaihsut inla, mi dangte lungnopna hawmsawn in. Na hihna ciangciang tawh lungkim theih sawm in. Nai \$30 man khat leh \$300 khat in, hun a maantakin lak thei tuak uh hi. Sumbawm \$30 man leh \$300 man te sungah a om sum a kibangh ahi hi. Mawtaw \$150,000 man khat leh \$30,000 khat in na pai nopna

mun hong tunpih thei tuak uh aa, a tam mat manin a lampi tomzaw tuanlo in, hih lampi pen hih lampi mah ahi hi. Dawn theih \$300 man a dawn mi khat leh \$10 man a dawn khat mihing vive mah hilel uh hi. Inn khan neukhat meter 300 kiim kot bang bek ah a teeng khat leh meter 30000 kiim kot ah a tengkhat, a thuak uh lungkhamna pen lungkhamna vive mah hi-in a kibangh ahi hi.

Lungnopna taktak pen hih a kimu thei leitung nate in hong pia theilo hi. Tutna nuampen (Business class) tawh Vanleeng tuangin na zin laitak, na Vanleeng tuahsia zenzen leh tutna nuamlo (Economy class) aa tute mah tawh a kibangin a thuak ding nahi hi.

Tua hi-in na lawmte kiangah na piak sawn ding lungnopna taktak bang daan cih a thei dingin kong lamen hi.

Hiah a kinial theilo thumaan nam 5.

1. Na tate mihau a suak dingin pantah kei inla, mi nuamsa a suak dingin pantah zaw in. Tua hileh, thu a theih uh ciangin, van man sangin, vante' thupina hong thupi ngaihsut thei zaw ding uh hi.
2. An zatui-in zangin, tua hikei leh zatui an bangin nazat hong kul ding hi.
3. Hong it taktak mikhat in 100 veikeek hong taisanna ding thu a piang zongin, hong tansan ngeilo cih phawk in.
4. Mihing ngeina leh mihing hihna kibanglo cih phawk in.
5. Na manlaang nop leh nang kia pai inla, gamla na tun nop leh ki pawlkhawmin kalsuan in.

Leitungah a hoih penpen doctor nam 6.

1. Nitaang
2. Tawlngakna
3. Kimaawlina
4. Nek le dawn
5. Kimuanna
6. Lawm le gual

Hiteng zat siam in cidam ding thupi ngaihsut in.

Kum bangzah pha in, bang hun bang hun ah na om laitak ahi zongin, na ni na hun ding pen anai, anai in, anai semsem ahih lam mangngilh kha kei in.

Na innkuanpihte it inla, na lawmte zong it tawntung in. Hong bawl Pasion mangngilh kha kei-in, hun khat ciang, nang hong la kik ding hi." Ci hi.

Hithute 'Steve Jobs Deathbed Speech' a kici thului khat pan ka tomlak ahi hi.

*Thului 20*

## **A Kiphawkkhalo Salpha**

*Na suakkik loh phamawh hi.*

*– Jesuh Khrih*

"Gupngah kitelcianna na neikhin hia?"

Tui sungah a tum theilo ding zah dongin a ki ngaihsun, a muanhuai na leh ahoihna hangin a minthang vangvang Titanic tembawpi, tuikhalpi tawh kisukha in Atlantic tuipi sungah a tumsuk diaidiai hun, April 15, 1912 kum zingsang nai 2:40 kiimpawl in sihna leh nuntakna kikaal ah a om mi 2000 valte lak ah mi khat va kileh kawikawi-in a phakzawh zahzah kiangah Gupkhatna thu a genpihna kammal ahi hi.

Tua mipa ahih leh kua mah in phawkin kinei khalo hi. Tua hun laitakin mi a tamzawte in a thugen ngaih dingin zong a tuatkhak manlo uh hi aa, tua mah bangin tuni dong ciang mah amah kinawl khin gige lai hi. Hollywood te in zongh hi mipa phawk dingin ngaihsunlo uh hi. Titanic thu tawh kisai Movie tampi a om khit hangin, tua mipa bulphuh in a kibawl Movie om nailo hi. Titanic tembawpi a kisiatna thu a kanciankik mipilte in zong tua mipa phawkin neikha lo uh hi. Ahi zongin, nasep hoih a sem tua mipa

ahih leh a theikha sunsunte' lungtang sungpan ki lakhia kik thei nawnlo hi.

Tua mipa pen, Pasion nasem John Harper hi-in, ta numei khat a neih khit ciangin a zi-in a sihsan mikhat hi sawnsawn hi. A pian thak khit kum 17 a phak a kipan a tuahtuah na ah Pasion thu genin, lam kiim lam paam ah a kileh kawikawi mikhat hi aa, tua bangin kum 6 sungbang a kileh kawikawi khitciang Baptist Pioneer Mission, London ah Rev. E. A. Carter in samin, tua mun pan Pasianna' a tangzai zaw in septheihna hun angah ahi hi. Hunkhat ciang, pawlpi khat phuan in tua lai ah Pastor semin om hi.

Titanic tembawpi tungah kum 6 apha, Nana a kici a tanu (Annie Jessie Harper) leh a sanggamnu tawh Chicago lam zuanin Moody Church akici D.L. Moody' pawlpi ah Pasion thu tangko ding in apai uh ahi hi.

A tuanna uh Titanic tembawpi tuisungah tum ding kithawita ahih manin, kih uutna tui puante kihawm ziahziah in, donghu gunkuang tungah mi a honhon in kinawn ziahziah hi. Harper in, a tanu leh a sanggamnu manlaang takin donghu gunkuang tungah kha hi. Tua laitakin amah zong, gunkuang tungah tuang pah nuam hileh a hithei ding ahi hi. Ahi zong, a tanu kiangah:

"Laukei o maw, Nana.. Khatvei ciang kimukik ding ihi maw..."

A cih khit ciangin, donghu gunkuang a ngah zolo mihonpite omna lam ah kileh in, gupkhiatna thu tangko kipan zen hi.

Kih uutna tui puana tawh tui pi tungah kivaan deekdeekin cihna ding a omnawnlo sih ding maingat mi tampite kiangah tuaksuk in, i thupatna kammal ahi:

"gupngah kitelcianna na neikhin hia?" ci-in khat khitkhat dongh kawikawi hi.

"Gupngah na kitelcian naikei a leh tu mahmah in Zeisu gumpa leh honpa in sang theilai hiteh. Zeisu gumpa leh honpa in sang lecin nuntak tawntung na ngah theilai hiteh" ci-in awng kawikawi hi.

Hi bangin a-awt kawikawi laitak mikhat in: "kei, gupngah kitelcianna nei nai ke'ng!" ci-in dawng kik hi. Harper in manlang

takin naih in: "Lawm aw Zeisu in nang hong it hi. Na mawhna khempeuh hong maisak khin hi. Nuntaakna hong pia nuam hi. Tu mahmah in na lungsim kongkhak na hon in." A cih khitciang, a gal khat aa-a om, khuavot lua hangin a kitan leepleep mikhat vanaih phe-in, a silhlai a tuipuan suah khia in; "kei sangin nang kizam zaw teh silh in," ci-in a silhsak khit a sawtlo in Harper tuisung ah tumsuk diaidiai hi.

Tui sungah tawmveipi a tumsuk khit ciang, khatvei hong laamto kik in, a nunung penpen lungdamna thu a genna, Christmas thu tomno khat tangko khia man lai hi.

Tua sungah,

"Zesu Khris eite' sih tangin a si dingin hong suak ahi hi. Ahi zongin tua hong suahna in hih tuipi sungah i tumsukna ding panin hong gumkhia lo kha ding hi. Hong gum khia kei mah ta leh, hih tuipi sungah tumsuk aa sihna sangin a lauhuai zaw tawntung sihna panin hong gum khia khinzo hi." ci kawmkawm in, tuipi sungah tumsuk diaidiai in, a nuntakna beita hi. Tua hun laitakin a piankum 39 pha pan aa, tuahsiatna hangin misi 1500 val sungah a kihel ahi hi.

Kum 4 khit ciangin, Titanic tuahsiatna sungpan a suakta kha sunte kimuh khopna masa kibawl hi. Tua mun ah, liamna baaina khit ah a suakta tangval khat in "kei pen Harper kikhelsak mite' sungpan a nunung pen kahi ding hi," ci-in, a tunga ih gen Harper' gupkhiatna thu tangkonate leh tua hangin gupna-a ngahna thu khitui luang kekeuh kawmsa in teci pang kik hi. Hi tangvalpa mah bangin Titanic tuahsiatna sungpan a suakta kha mi dangte in zongh, John Harper in Sawltak 16:31 sung a husan tawp tawh kiko in awngawng hi, ci-in gen uh hi.

Hi mipa tawh a kisu kha sunsunte in mangngilh thei nawnlo uh hi. Tua mah bangin tu dongin, Moody Church, Chicago ah a om John Harper Phawkna Innpi-in zongh a ki mangngilh theilo Khazih Salpha khat ahihna hong phawksak hi.

Lungdambawl i cihcih Zeisu Khirs hong suak ni phawk-kikna ibawl zel hun hong tung kik ding hita hi. Harper' cih bang ngeei-in Zesu Khirs hong suahna hangin nisim ih nuntakna sungah ih tuah khak haksat buainate pan hotkhiatna kingah pah lo kha dinga, ahi zongin, tuate tawh teh theih ahilo tawntung sihna panin hotkhiatna ngah in NUNTAK TAWNTUNGNA angah khin ihi hi (John 3:16).

## **Laigelhpa**

Laibu gelhpa tu laitak, The Hebrew University of Jerusalem, Faculty of Agriculture, Food and Environment ah Postdoctoral Research Fellow in a om laitak ahi hi. 2016 pan kipanin Environmental Biotechnology Network (EBNet), UK; 2017 panin Bioenergy Society of Singapore (BESS), Singapore; 2022 panin The New York Academy of Sciences (NYAS), USA, leh Member of the Institute of Biology, UK te ah member in kihel hi.